



ЭРКИН ВОҲИДОВ

ЯХШИДИР АЧЧИҚ  
ҲАҚИҚАТ

ЯНГИ ШЕЪРЛАР

А. ҚОДИРИЙ НОМИДАГИ ХАЛҚ МЕРОСИ НАШРИЁТИ  
«НУР» ТОШКЕНТ 1992

Ушбу тўплам машҳур шоир, жамоат арбоби Эркин Воқиднинг кейинги йилларда ёзилган шеърлари гулдастасидан иборатдир. Шоир, қалб булогидан чиққан соф туйгулар ифодаси бўлмиш бу шеърларида ширин ёлғонни айтиб кимларгадир ёқишдан кўра, аччиқ ҳақиқатни айтишни афзал кўради. Китобхонга ушбу шеърий гулдаста манзур бўлади, деган умиддамиз.

Муҳаррир  
ХОЖИ АБДУЛЛО ОРИФ

ISBN-5-86484-059-9

© «НУР». ИЧИБ, А. Қодирий номидаги халқ мероси нашриёти 1992

## СҮЗ СЕҲРИ

Мана, бир неча ўн йиллардирки, биз дилбар бир шеъриятнинг муаттар ҳавосидан баҳраманд бўлиб келаётирмиз. Бу — Эркин Воҳидов шеъриятидир. Она тилимизнинг ипакдек майин, камалакдек ранг-бараанг шамойили, ғоят нозик лутф, беозор қочиримлар, гоҳ ҳазин, гоҳ самимий табассум уйғотувчи ташбехлар, ўткир хулосалар — булар бари улкан шоиришимизнинг қаламига мансуб бетакрор фазилатлардир. Мен Эркин Воҳидовни шеъриятда ўзига хос сеҳр соҳиби деб биламан. У шеъриятнинг ўжар ва асов, учқур отиғни усталик билан жиловлаб, мана узоқ йиллардан буён шарқнинг шарафли назм майдонида моҳир чавандоз янглиғ донг чиқазиб келаётир. Ўйлаб қарасам, биз ғалати даврларни бошдан кечирибмиз: яқин-яқинларгача ҳам кўринишдан дубдуруст одамлар, адабиётда аввал шаклми ёки мазмунми дея бетўхтов тортишиб юрадилар. Албатта, бу баҳснинг замирида бошқа бир мурод яширинган эди. Яъни, маҳорат, санъат шарт эмас, яланғоч бўлса ҳам бизнинг ғоямизни такрорлайбер! Ана шу тазийқ туфайли не-не истеъдод эгалари ўзларининг бена-

зир маҳоратларини намойиш эта олмадилар. Мактаб дарсликларида: «Пахта терсанг тоза тер, чаноғида қолмасин» каби техник қўлланмалар, руҳсиз гаплар шеърият намунаси дея тақдим этилди. Қирқ йилча муқаддам жамол кўрсатган Эркин Воҳидов шеърияти ўша қоронғу гўшаларни бирданига ёрита бошладики, шоиримиз ўзининг илк китобини бежиз «Тонг нафаси» деб атамаган эди. Ўлмас аruz вазнига беписанд қараш ҳали ҳукмон бир шароитда, Собир Абдулла, Ҳабибий, Чархий сингари мўътабар сиймолардан кейин мумтоз ғазалиётимизнинг олтин эшиклари абадий бекилади дея каромат қилишаётганда ёш авлод орасидан бириңчилардан бўлиб Эркин Воҳидов арузниң табаррук остонасида пособон янглиғ пайдо бўлди. Тўғри, ҳозиргача ҳам арузда ижод қилувчилар озмунча эмас. Бироқ, соғлом кишининг нафас олишидек мунтазам ва равон, асл аруз мавжудки, бусанъатга «булҳавас»ларнинг аралашувлари ҳеч қандай самара келтирмайди. Аксинча, содда муаллифни куппа-кундуз куни беобрў қилиб қўйиши мумкин. Шу маънода, ғазалга таважжуҳ билдирган ёшларимизга ҳозирги замон шоирларидан Эркин Воҳидов ижоди мактаб бўла олади, дейман.

Юқорида биз мазмун ва шакл атрофида баҳслар бўлиб ўтганлигини эслатдик. Такрор айтамиз, у тамомила беҳуда баҳс эди. Биз кўриб ва ҳис қилиб турган олам бир бутундир, яъни тан либоси ичра руҳ яшайдики, биз иккисини яхлит ҳолда мукаммал хилқат дея эътироф этамиз.

Эркин Воҳидов шеъриятида абадий мавзулар хазинасига аниқ замон ва макон қалити орқали кириб борилади. Ҳалқимиз кейинги даврлар мобайнида босиб ўтган ва ўтаётган гоҳ машаққатли, гоҳ армонли, гоҳ түғёнли, гоҳ ифтихорли йўлларнинг манзара ва оҳанглари, садолари Эркин Воҳидов шеъриятида тўла мужассамдир. Ҳали олдинда узоқ, донғил йўллар кутиб турибди. Биз мустақилликка эришган Ўзбекистонимиз учун, она ҳалқимиз учун бундан буён ҳам астойдил хизмат қилишга шаймиз. Гоҳ юксак тоғларининг бўю-басти узоқдан яққолроқ кўринади дейдилар. Лекин мен у узоқ масофаларни кутиб ўтирмасдан, ҳозирнинг ўзидаёқ бир гапни очиқ-ойдин айтиб қўяқолай: Мен Эркин Воҳидовдек улкан шоир билан замондош бўлганим билан фахрламан. Шоиримизнинг ушбу янги китоби эса муборак бўлсин!

*Хожи Абдулло Ориф*

## ВАТАН ИСТАГИ

Бу ватанда бир Ватан  
Кўрмоқни истайдир кўнгил,  
Ўзни озод қуш каби  
Кўрмоқни истайдир кўнгил.

Бу Ватан тимсоли бўлса  
Тонг қуёши шуълавор,  
Шуълалар қўйнида чарх —  
Урмоқни истайдир кўнгил.

Ул Ватанга байроқ — инсоф,  
Туғи сарҳад муҳри — меҳр,  
Сарҳад узра соқчилик  
Турмоқни истайдир кўнгил.

Ким бу тупроқ қадрин истар  
Айламоқ тупроққа тенг  
Кўзига тупроқ билан  
Урмоқни истайдир кўнгил.

Ул Ватан елканларини  
Маърифат уммонида  
Қиблаи имон сари  
Бурмоқни истайдир кўнгил.

Бас, етар ёлғон саодат,  
Ёлғон эрк, ёлғон ватан,  
Ҳуррият завқини чин  
Сурмоқни истайдир кўнгил.  
Қутлуғ истиқлол кунида  
Эй Ватан, бағрингда шод  
Эркин ўғлонинг бўлиб  
Юрмоқни истайдир кўнгил.

1990

## ДОРИЛФУНУНГА

Яна йигирмага — йигит ёшимга  
Узоқ йиллар ўтиб қайтган бу куним,  
Таъзим қилиб келдим сенинг қошингга  
Азизим, муnisим, дорилфунум.

Недирсан? Олисга ундан садо,  
Ё олис йиллардан чорлаган уним.  
Сени соғинаман ва икки дунё  
Сенга интиламан, дорилфунум.

Болангман, бор ҳали ўзингга ҳамдам  
Шўхлик, эркалагим, андек жунуним.  
Ким бўлсам, не бўлсам ва қайда бўлсам,  
Сен мени тергаб тур, дорилфунум.

Ҳаёт бешафқатдир, яшаш мураккаб,  
Ёзолмай гоҳ дилга чўккан тугуним,  
Илтижо қиласман, бедор юракка  
Қудрат бер, ёшлигим — дорилфунум.

Ҳали бу оламга саволим кўпдир,  
Хаёлим қушида йўқ лаҳза қўним.  
Яна шам чироғинг керак бўлибдир,  
Йўлимни ёритгин, дорилфунуним.

Шеъру ишқ, баҳт, қувонч — дунё бири  
кам,  
Фақат эътиқодим — танҳо бутуним.  
Қалбим тубидаги энг ёруғ нуқтам —  
Сенга талпинаман, дорилфунуним.

Эзгулик соғинчи ўртаб кўнгли́мни  
Бош уриб қошингга келган бу куним —  
Сидқимни қабул эт, тарқ этма мени,  
Азизим, мунисим, дорилфунуним.

1987 йил январи

## ЯНГИ ЙИЛ ШЕЪРИ

Инсон феъли ажабдан ажаб,  
Йўқди́р унга мезонсиз олам.  
Юлдузларни ўлчар ботмонлаб,  
Қаричлайди чексизликни ҳам.

Ўзи эга, ўзи қул мангур  
Ўзи топган ақидаларга,  
Не дей, ҳатто мангаликни у  
Бўлиб чиққан дақиқаларга.

Дақиқадан соатлар йиғиб,  
Кунлар тузиб ой жам қилади.  
Йиғламайди умр ўтди деб,  
Йил ўтди деб байрам қилади.

Кўпайса-да, ажинлар ҳарчанд,  
Оқарса-да, йиллардан боши,  
Қувонади — кўпайди фарзанд,  
Севинади — улғайди ёши.

Бу туганмас орзу ҳавасда  
Бор умидбахш имонга асос:  
Инсон ўлмас.  
Аста ва аста  
Боқийликка ўтади холос.

1987

\* \* \*

— Орол ўлаётир,  
Сир ўлаётир,  
Ўлаётир заҳардан тупроқ.  
Шоир бунга қарши не қилаётир?  
— Шоир дафтарида каттакон  
сўроқ.

У фақат қичқирад:  
Бундоқ бўлмайди.  
Аlam билан ёш тўкар, бироқ  
Унинг кўзёшидан Орол тўлмайди,  
Фақатгина ер бўлар шўрроқ...

1987

## ДЕВОНА ҲАҚГҮЙ

Яна сенинг тўнинг елкангда,  
Сиғмай қолдинг бу даргоҳга ҳам.  
Лабда аччиқ қимтилган ҳанда,  
Ташқарига қўясан қадам.

Туққанингга ёқмас тўғри гап,  
Шуни англаб етмаган бўлсанг,  
Бу дунёда шунча йил яшаб  
Дипломатлик аталган адаб  
Кўчасидан ўтмаган бўлсанг,—

Кўнгилдаги гапингни қачон  
Кимга қандай сўзламоқ керак,  
Ўзингга не фойда, не зиён,  
Англамаган бўлсанг гар, демак —

Айб ўзингда,  
Токи бу дунё  
Тили бурроларга ёр экан,  
Манманлиқдек тузалмас савдо  
Одамзод бошида бор экан.

Токи бошлиқ зоти экан ҳақ,  
Гапи гапу сўзи сўз экан,  
Тўрдагилар ҳокими мутлак,  
Пастдагилар юмуқ кўз экан:

Пешонангга битилган аттанг,  
Енгилемоқ бор доимо жангда.  
Мудом сенинг қўлингда паттанг,  
Мудом сенинг тўнинг елкангда.

1987

## ГЕОРГИЙ АЪЗАМОВ ХОТИРАСИГА

Тундек қаро этиб юрагимни ҳам  
Хабар етиб келди кечаси.  
Менинг Жора исмлик укам,  
Тожихон аканинг кенжаси...

Қадам қўйган эдинг шахмат тожининг  
Курашгоҳи остонасига.  
Отанг манглайига сиғмадинг,  
Сиғмадинг ўзбекнинг пешонасига.

Қайта туғиларми ўғлон сенингдек,  
Қанча юксак эди тилагинг.  
Юраги ёрилиб кетган лочиндек  
Баландликдан ногоҳ қуладинг.

Мухлис эдим, ҳар бир ғалабанг  
Менга эди мисоли тўйдек.  
Сен музaffer кетдинг, биз эса, аттанг,  
Бизлар сени бой бериб қўйдик...

1987

## ЖУМАДАН ҚОЛГАН ОДАМ

Бу сизга бир ҳикоя:  
Чорак аср муқаддам  
Ўсал ётар эди чол,  
Сўнар эди мисли шам.  
Узок-яқин авлодлар  
Атрофида бўлиб жам  
Видо айтар эдилар,  
Қадлар эгик, кўзлар нам.

Кеча соппа-соғ эди,  
Эй, воҳ, қисмат экан-да,  
Ажал бўғиб турибди  
Оғзи ошга етганда.  
Фалак иродаси шу.  
Не қилсин шўрлик банда,  
Илож қанча, ўлим бор  
Ҳамманинг бошида ҳам.

Ҳа, ўлим бор муҳаққақ  
Ҳар кимсанинг бошида,  
Лекин ўлмоқ савоб-ку,  
Пайғамбарнинг ёшида.

Яна эрта жума кун  
Тургай меҳроб қошида,  
Яхши кундан буюрди,  
Мўмин эди ва ҳотам.

Кампир тахмонни очди,  
Кафаникни олдилар.  
Эркакларга тўн, белбоғ  
Ахтаришиб қолдилар.  
Катта уй ўргасига  
Ўликка жой солдилар.  
Ҳовлию эшик олди  
Супурилди зап шинам.

Қори почча келдилар  
Дарбозадан йўталиб.  
Ювғувчи ҳозир бўлди  
Бўйрасини кўтариб.  
Амма самовар қўйди  
Тарашани тутатиб  
Тонгдан тумонат келса  
Шошиб қолмаслик — шу ғам.

Қазноқдан чиқарилди  
Маъраканинг уни ҳам,  
Тугиб қўйилди тайёр  
Домланинг тугуни ҳам.  
Белгиланди ҳаттоки  
Йигирманинг куни ҳам,  
Ҳамма нарса бадастир,  
Фақат битта ўлик кам.

Пуховой рўмол билан  
Хола боғлади белин,  
Хабарлашга бошлади  
Ҳар ким ўз уруғ — элин.  
Жанжаллашиб ҳам олди  
Ўртада икки келин,  
Алам ўтган ҳиқиллаб  
Йўғлар эди: «Вой, додам!»

Ҳеч кимсанинг иши йўқ  
Дардга мутбтало билан.  
Қизлар сандиқ билан банд,  
Кампирлар дуо билан,  
Бир вақт тунни уйғотиб  
Чинқириқ садо билан  
Чироқлари пирпираб  
Келиб қолди «Тез ёрдам».

Ҳамма суюниб кетди  
Деб ўйларсиз, бор бўлинг,  
Ён қўшни Жаннат биби  
Докторнинг тўсди йўлин,  
Тўнғич қиз доно бўлиб  
Тутди ҳамшира қўлин:  
«Игна санчиб қийнаманг,  
Тайёр ётибди отам.

У доим оз оғриғу  
Осон ўлим тиларди,  
Бобомдек олтмиш учда  
Ўлишини биларди.  
Айниқса жума кунни  
Кўп илтижо қиласарди,  
Муроди ҳосил бўлди,  
Оёқ чўзсин хотиржам».

Доктор қулоқ солмади,  
Бўш келмади ҳамшира,  
Бўш келмади ноль учга  
Хабар қилган набира  
Липиллаб турган у шаъм  
Шу тун бўлмади тийра,  
Касал кўзини очди  
Жумадан қолдим мотам.

Эрталаб икки ўғил  
Ишга кетди сўппайиб,  
Девор тагида тобут  
Қолаберди дўппайиб,  
Юрганча юраберди  
Икки келин хурпайиб  
Жанжалнинг боисини  
Икков ҳам айтмас, дам-дам.

Яна кўп жума ўтди,  
Ой-йиллар ўтди қатор,  
Саксон саккизга борди  
Ўлдига чиққан bemor.  
Ҳар ёшига бир таноб  
Боғ ўстирди мевазор.  
Юзни мўлжаллаб турар  
Жумадан қолган одам.

Набиралар сони ҳам  
Юзга борди, чамаси,  
Ҳар жума чол уйида  
Йифилади ҳаммаси.  
Келар докторни қувган  
Хонадоннинг аммаси,  
Кулиб-кулиб эслашар,  
Ҳар жума бўлар байрам.

Мана яшаб юрипти  
Умри экан зиёда.  
Уни ўлди деганлар  
Кўплари йўқ дунёда.  
Жаннат биби жаннатга  
Кетди бултур жавзода,  
Қорини ўн йил бурун  
Олиб кетган зотилжам.

Бақар йили тупроққа  
Қўйган гўрков дўстини.  
Чол ўзи тўғраб берган  
Йил ошининг гўштини.  
Қадрдондан ёдгор деб  
Ўз қабрининг устини  
Гул қилиб, тиклаб қўйган  
Кичкина сағана ҳам.

Чол айтар, олтмиш уч не,  
Саксон саккиз нимадир  
Умр гўё дарёдан  
Сузиб ўтган кемадир.  
У соҳилга етмоқ бор  
Пайшанбадир, жумадир,  
Лекин жадаллаштириш  
Бунда не керак, бўтам?

Шошманлар, у дунёни  
Кўрдим, унча ёқмади,  
Равзаи Фирдавс ичра  
Оби кавсар оқмади.  
Кампирим дуруст экан,  
Ҳурлар менга боқмади.  
Аразладим, қайтвордин  
Тўғри келмади Эрам.

Болаларим, сўнгги гап:  
«Ётиб қолсанг, ёт куймас,  
Бир-бировни авайланг,  
Ўлган билан ер тўймас,  
Энди сиз ўлтириинглар,  
Мен ҳавода бир нафас...»  
Деру ўрнидан туриб  
Боғ сари қўяр қадам.

1987

## МАТМУСАНИНГ МЕҲМОНДЎСТЛИГИ

Меҳмон жуда азиздир  
Донишқишлоқ томонда.  
Дерлар, майли биз ўлсак,  
Меҳмон бўлсин омонда.

Мана, шаҳарлик меҳмон  
Қишлоқ кезиб юрибди.  
Ўнга гўзал табиат  
Маъқул бўлиб турибди

Айниқса тўполнон сой  
Меҳмонга ёқиб кетди,  
Оҳ-оҳ деб сувга тушди,  
Тушди-ю, оқиб кетди.

Гоҳ чўкар, гоҳ кўринар,  
Дод солар: «Қутқарингиз»,  
«Спасите», «даст-бидех»,  
«О май френд, хелп ми, плиз».

Испанча, португалча,  
Лотинча қичқиради.

Белни ушлаб Матмуса  
Ҳайрон бўлиб турди.

«Шунча тилда додлашни  
Ўрганиш ҳавасмиди,  
Ундан кўра сузишни  
Ўргансанг бўлмасмиди».

Ўлар ҳолга етганда  
Сув кириб томоғидан  
Меҳмонни олиб чиқди  
Ушлаб бўйин боғидан,

«Шаҳарлик шаҳарлик-да»  
Дер Матмуса кўнглида,  
Керакли арқонини  
Олиб юрар бўйнида.

Қиргоқча чиқди шошмай.  
Сўнг ақлини юритиб,  
Арқонидан дарахтга  
Осиб қўйди қуритиб.

1987

### БИЗДАН КЕЙИН ҲЕЧ БИР АВЛОД ҚАЙТА ҚУРМАСИН

Олғир учун қайта қуриш —  
Бир қозон шўрва,  
Элдан бурун коса олиб  
Чопмоқ бўлади.  
Худбин учун қайта қуриш —  
Каттакон кўрпа,  
Бир амаллаб ўз устини  
Ёпмоқ бўлади.

Жоҳил учун қайта қуриш —  
Найза урмоқдир,  
Энг қобил, энг пок юракни  
Нишонга олиб.  
Бизнинг даврон келди дея  
Димоги чоғдир,  
Биладики, тош биллурдан  
Ҳамиша ғолиб.

Қайта қуриш —  
Сафсатабоз учун бир чолғу,  
Унга эски оҳангларни  
Тез жо қиласди.  
Бир хил тинғир-тинғирини  
Чалабериб у  
Энг табаррук қўшиқни ҳам  
Расво қиласди.

Бюрократга қайта қуриш —  
Дорбозлик демак,  
Мувозанат лангар чўпин  
Қаердан тутсин.  
Бугун омон, эрта тамом,  
Ширин жон ҳалак,  
Тарих ортга қайтмас,  
Шўрлик нимани кутсин.

Қайта қуриш —  
Омади йўқ шоирга — қудуқ,  
Искандарнинг шохи бор деб  
Секин айтади.  
Бу кудуқда қамиш унмас,  
Гапдан фойда йўқ,  
Фақат қорин шишганини  
Ёзиб қайтади.

Бу бошлиққа қайта қуриш —  
Шахмат ўйини,  
Ҳар кун шахмат доналарин  
Қайта терар у.  
Коллегия эслатади  
Девлар тўйини,  
Нечта жонни янчанидан  
Рапорт берар у.

Кўр тутганин қўймас зкан,  
Эшитганин кар,  
Бу одамнинг миясида  
Беш-ўнта шиор.  
Коммуна деб атар бўлса  
Очликни агар,  
Принципга содик —  
Очдан ўлар баҳтиёр.

Бу олимни —  
Замбаракка ўхшатиш мумкин.  
Орқа билан жангга кирав —  
Сабаби аён.  
У орқага қараб туриб  
Ўтмишнинг мулкин  
Тўпга тутса  
Қолар тарих ўрнида тўзон.

Дерлар: урсанг эти қотар,  
Гар сўксанг — бети,  
Одамзод ҳам айланар ер  
Курраси билан.  
Бу кас аввал орден билан  
Мақтанар эди,  
Бугун эса мақтанади  
Ғурраси билан.

Ҳар оғизга бир-бир қўйдик  
Биз аччиқ дори,  
Ўзимиз-чи? Ўзимизга  
Не қайта қуриш?  
Биз учун уомбир!  
Оғриқ тишлар қатори,  
Миямизда занглаб қолган  
Михни суғуриш.

Қайта қуриш — кетмон,  
Бир вақт пастдан юқори  
Қазилган у терс ариқни  
Ўрнига буриш.  
У бульдозер.  
Манманликдан топилган бари  
Иллатларни кечаги кун  
Жарига суриш.

Хўжакўрсин қабристони,  
Ёлғон мозори,  
Эгасизлик гўрин ясаш —  
Бу қайта қуриш.  
Оlam аро уч мингинчи  
Йиллар сардори,  
Ватанга мос ўрин ясаш —  
Бу қайта қуриш.

Мен учун у деразадан  
Кирган шамолдир,  
Бу шамолдан қоғозларим  
Афтодаҳолдир.  
Улар учар, мен ортидан  
Қараб тураман,  
Шеърим, энди мен ҳам сени  
Қайта қураман,

Кунлар кўрдик,  
Остонада турган истеъдод  
Бизнинг кўрган у кунларни  
Қайта кўрмасин.  
Шундай қайта қурайлики,  
Энди умрбод,  
Биздан кейин ҳеч бир авлод  
Қайта қурмасин.

1988

## ЭСКИ ҲАММОМ, ЭСКИ ТОС

Қайта қуриш хусусида  
Оlam узра жарангос,  
Давраларда баҳслар қизғин,  
Баҳсларда зўр эҳтирос.  
Кўп орзулар топди ҳаёт  
Кўзгусида инъикос,  
Аммо бизнинг томонларда  
Ҳали фақат гап холос,  
Ҳаёт эса ўша-ўша:  
Эски ҳаммом, эски тос.

Аввалгидек йил бошида  
Йил режасин бичамиз,  
«Бажарамиз» қасамины  
Кўк чой каби ичамиз,  
Сўнг ўн бир ой сусткаш умр  
Дарёсида кечамиз,  
Йил сўнгида: «ҳайда-ҳайда»,  
Ой сўнгида: «бос-ҳа, бос!»  
Қоидамиз ўша-ўша:  
Эски ҳаммом, эски тос.

Биз мажлиссиз яшолмаймиз,  
Мажлисга ҳам план бор,  
Мажлис дема — кураш! Сени  
Пийпалашга гилам бор,  
Содда бўлма, у гиламга  
Тайёргарлик билан бор,  
Чап беришни, чалишни бил,  
Жавоб зарбин ўрган хос.  
Ишни бўлса... иш маълум гап:  
Эски ҳаммом, эски тос.

Кимга керак ташаббускор,  
Билгувчи йўл-йўриқни?!  
Ташаббускор ишни бузар  
Кутмай юксак буйруқни.  
Бизлар эсак — камтар одам  
Қовуштириб қуллуқни,  
Жим турамиз, биламиз-да,  
Жим туришга бор асос.  
Бизга асли жуда мақбул:  
Эски ҳаммом, эски тос.

Қандай асос, дерсиз. Раҳбар  
Сўзи доим сўз бўлган,  
Унга «қарши», «бетараф» йўқ,  
Овоз доим юз бўлган,  
У истаса икки беш қирқ,  
Икки ўн тўққиз бўлган,  
Тарихга боқ, раҳбарингни  
Шаҳаншоҳга қил қиёс,  
Аъёнлару гумашталар:  
Эски ҳаммом, эски тос.

Кимки баланд учмоқ бўлса,  
Бўлса ҳам у отамиз,

Асло парвоз қилдирмаймиз,  
Оёғидан тортамиз,  
Амаллаймиз, бўйнига бир  
Маломатни ортамиз,  
Деймиз, сени биз эҳтиёт  
Қилмоқдамиз, Мирғиёс,  
Баланд учма! Тинч сенга шул:  
Эски ҳаммом, эски тос.

Бозоримиз ўша бозор,  
Олой, Эски Жўвамиз,  
Мақол ўша, пул бўлса гар  
Чангалдадир шўрвамиз,  
Бир тўрва пул билан тушсак,  
Тўлиб чиқмас тўрвамиз,  
Баракалла эпчил йигит,  
Қандингни ур, Мирваққос,  
Касбинг ўша, нафсинг ўша:  
Эски ҳаммом, эски тос.

Дўконимиз ўша дўкон,  
Унга ҳам ҳеч ривож йўқ,  
Пул чангаллаб, кўнгилдаги  
Мол топишга илож йўқ,  
Турмуш дерлар, бола-чақа,  
Кимда ҳам эҳтиёж йўқ,  
Ҳар юлғичга қуюқ салом,  
Ҳар ўғридан илтимос,  
Ҳолатимиз ўша-ўша:  
Эски ҳаммом, эски тос.

Содда, мўмин одамлармиз,  
Кўнгилда йўқ киrimиз,  
Оlam ҳайрон, англолмас не  
Бу юввошлиқ сиrimиз.

Биз жим турдик, ўлди Орол,  
Битди Аму, Сиримиз,  
Авлодларга қолар бўлди  
Захарланган ер мерос,  
Дод фарёддан не наф, амал —  
Эски ҳаммом, эски тос.

Фарзандларни биз не учун  
Келтирамиз дунёга?  
Ақлу қалбин, умру баҳтин  
Тўлдирмасак зиёга,  
Туғдирмоғу туғмоқ биздан.  
Қолган умри худога,  
Яна баҳтли болаликдан  
Солурмиз айюҳаннос,  
Наҳот бўлгай эртамиз ҳам  
Эски ҳаммом, эски тос.

Хўп иш бўлди, ўзбекмас деб  
Айтдик Ибн Синони.  
Гар мўъжиза тирилтиrsa  
Ул табаррук сиймони,  
Болаларнинг ўлимидан  
Қирқ газ сакраб имони,  
Дерди, наслим, билмадим ё,  
Папуасми, эскимос.  
Гаплар ошкор, ишлар эса  
Эски ҳаммом, эски тос.

Бизга ишдан ҳеч гапирманг,  
Гап сотишга устамиз,  
Юқ тортишмас, бирорларга  
Юқ ортишга устамиз.  
Ўлганларнинг орқасидан  
Тош отишга устамиз,

Тиригидә деймиз фақат  
Пайғамбарлик сизга хос,  
Ялтоқилик ўша-ўша:  
Эски ҳаммом, эски тос.

Дилимизда гапимиз кўп,  
Айтган билан битмайди,  
Лекин дардлар чорасига  
Гапнинг ўзи етмайди,  
Бундан буён аравада  
Жим ўтириш кетмайди,  
Йўқса, тарих бир кун биздан  
Олажакдир алқасос,  
Насибамиз бўлгай мудом:  
Эски ҳаммом, эски тос.

1988  
**ДИАГНОЗ**

*Қишлоқ докторининг  
айтганлари*

Ҳамма билар:  
Тиббий илмда  
Овруподан анча йироқмиз.  
Ҳамма бало, менинг наздимда,  
Диагноз қўйишга нўноқмиз.

Дейлик,  
Бемор бошида оғриқ,  
Бу — чарчоқдан.  
Ким дер: дам олгин?  
Юборамиз, текширмай ортиқ,  
Думбасидан тўртта анальгин.  
Касал кўриб,

Айтамиз — буйрак!  
Нақ Луқмоннинг ўзи сингари.  
Ўлигини сўнг ёриб кўрсак,  
Илма-тешик чиқар жигари.

Э, жигарнинг иши кўп нозик,  
Қишлоқда йўқ, асли, соғ одам.  
Дейлик,  
Тўғри диагноз қўйдик,  
Тепки еймиз райком тогадан.

«Сиёсий онг қани,— дейди у,  
Дехқон соғлом!  
Дехқон — чавандоз!  
Далада йўқ захарлик дору,  
Диагнози шамоллаш деб ёз!

Сариқ касал кўпми? Камайтир,  
Чорани мен айтмай ўзинг топ.  
Мен эмас, сен докторсан, ахир,  
Ўқиши керак газет ва китоб.

Не ёзилган анув шиорда?  
«Пахтазор — бу жанггоҳ», бўлсин  
ёд!

Дард саналмас ёмғиру қорда  
Пахта териб орттирилган бод.

Шундоқ.  
Бизлар тиббий илмда,  
Овруподан анча йироқмиз.  
Ҳамма бало, менинг наздимда,  
Диагноз қўйишга нўноқмиз.

Ҳолимиз шу,  
Не узримиз бор?

Бизнинг хато завол деган сўз.  
Аслида-ку, жамият bemор,  
Кимлар қўяр унга диагноз?

Уни даво қилгувчи кимлар?  
Не савдолар бордир бошида —  
Биз сингари ношуд ҳакимлар,  
Зўр тағолар турса қошида.

Жарроҳ тиғлик фузало бир кун  
Айтмасин-да, ўтиб замонлар:  
— Бу юрт дарди бошқа эди-ку,  
Ҳайф сизларга, жоҳил луқмонлар!

1988

## УЯТЧАНИК

### «Тоифалар» китобидан

Бу қалтис дард,  
Зийрак бўлинг,  
Белgilари аёндир:  
Бош сал эгик, қўл кўкракда,  
Тил сучук, юз алвондир.

Уларга кўп дуч келганман,  
Кўнглим дарҳол сезади.  
Уятчанлар одоб билан  
Юрагимни эzáди.

Мана унга қаранг!  
Хушрўй,  
Мўмингина боладир.

Порахўрмас, қўлингизни  
Қайтаролмай оладир.

Содда йиғит туғилмаган —  
Ўғли учун уй олди.  
Лекин кўчиб боргани йўқ,  
Ўз уйи бор, уялди.

Дўкондор ҳам кўп уятчан,  
Қизил қофоз қасдида  
Бош кўтармас.  
Икки кўзи  
Пештахтанинг остида.

Бу — отадир,  
Аслида у  
Оталикка яролмас.  
Дада, дея чопиб келган  
Боласига қаролмас.

Ҳамжасбим бор —  
Соҳиб зиё,  
Эл дардини туёлган.  
Лекин ҳақ сўз айтмоққа у  
Катталардан уялган.

Бу амалдор кўтарилиган  
Кимларгадир суялиб.  
Трамвайдаги юрмайди ҳеч  
Ҳалойикдан уялиб.

Унга сира иш тушмасин,  
Бағринг қонга бўялар.  
«Хўп» дегани тортинади,  
«Йўқ» дегани уялар.

Мулойим зот сеҳргардир,  
Нақд қурбони бўласиз.  
Кулиб туриб пичоқ урса,  
Раҳмат айтиб ўласиз.

Уятчанлик эга шундоқ  
Киши билмас қувватга.  
Бир уятчан бутун элни  
Қўяолар уятга.

Биз улардан кулсак, ичда  
Улар биздан кулади.  
Бу касални йўқ қилмасак  
Жуда уят бўлади.

1988

\* \* \*

Амалдорлар талашиб ўрин,  
Бир-бирининг қуритар шўрин.

Тентак бермай тентакка тўрин,  
Қуритади тентакнинг шўрин.

Шахматчилар излашиб зўрин,  
Бир-бирининг қуритар шўрин.

Олим топиб одимнинг ғўрин,  
Касбошининг қуритар шўрин.

Қассоблар-ку ҳаммадан бурун  
Танишининг қуритар шўрин...

Шоирлар-чи? Беріб қалб қўрин,  
Шеър ёзмоқнинг ўрнига, кўриңг —

Ўлмай туриб талашиб гўрин,  
Бир-бирининг қуритар шўрин.

1988

## ҚАРСАК ҲАҚИДАГИ ШЕЪРГА ЖАВОБ

Мен шеър ёзсан,  
Ўқисам уни,  
Тинглаганлар қарсак чалмаса.  
Бирор кимса бирор сўзини  
Ёдида ҳам сақлаб қолмаса.

Фақат биттагина бўз ўғлон  
Уйга қайтгач, йиғласа тўлиб.  
Йиғлаб-йиғлаб тонг бўзарган он  
Уйғонса у Алпомиш бўлиб.

1988

\* \* \*

Кажфеъл, кажрафторлар тарбиясига  
Каждумлар қисмати ибратдир аён.  
Жаҳолат авжида ўз миясига  
Ниш уриб қўяди баъзида чаён.

1988

## АМАЛДОРНИНГ ЎЛИМИГА

Дод, минг дод,  
Мен йўқотдим азиз кишимни!  
Ўлмай ўлгур,  
Битирмасдан кетди — ишимни!

1988

## ҚУРОЛСИЗЛАНИШ

Бир ўрмонда яшар эди икки қабила,  
Диназавр, мамонт овлаб бирликда омон.  
Не бўлдию бир ов лоши талоши ила  
Икки томон жангга кирди қаттол, беомон.

Тил забонсиз вахший тўда, ёввойи аждод  
Қон исидан маст — бир-бирин қириб  
ташлади.

Бу қирғинда омон қолган икки одамзод  
Бир-бирига қараб аста юра бошлади.

Ана, улар бир-бирини ўлдирап ҳозир,  
Ер юзида инсон насли тугайди буткул.  
Шу пайт ногоҳ бири тўхтаб қолди-ю, оғир —  
Чўқморини секингина ерга қўйди ул.

Рақиби-чи? У ҳам сезди бу не ишора,  
Қўлидаги қирра тошни нарига отди.  
Икков қўлни қўлга берди, шундан иборат  
Ҳайвонликдан озод бўлди инсоннинг зоти.

Милион йиллар ўтди, одам наслига, ажиб,  
Тарих бўлди инсонликдан ортга тисланиш.

Халтасига тош йиғдию бўлмади насиб  
Инсонликка қайтиб яна қуролсизланиш.

Тақдир ҳукми ила яна қилди рўбару  
Уша ваҳшат ўрмонида тимсол икки жон.  
Букун бир бор ғолиб келди инсоний туйғу  
Тошни ерга отмоқ бўлди иккала томон.

Бу янги бир тарих бўлгай! Қани бир йўла  
Ушалса минг йиллик орзу, тузалса янглиш.  
Насиб бўлса шубҳа тўла, душманлик тўла  
Юракларга ёвузликдан қуролсизланиш.

Музлар эрир, инсон насли бўлмагай хариф,  
Меҳру инсоф уст бўлгаю кинлар ост бўлгай.  
Олқиши сенга одамизод, эй зоти шариф,  
Инсонликка қайтган кунинг шояд рост  
бўлгай.

1988

## ЯХШИДИР АЧЧИҚ ХАҚИҚАТ

Яхшидир аччиқ хақиқат,  
Лек ширин ёлғон ёмон,  
Ул ширин ёлғонга мендек  
Алданиб қолғон ёмон.  
Умримиз алдоқ жаҳонда  
Алданиб ўтгай, валек  
Сўнгги қийналғон ёмондир,  
Сўнгги қийналғон ёмон.  
Айтгали аччиқ азобинг  
Бўлса дилдош яхшидир,  
Сўз демай ўтли аламни  
Жонингга солғон ёмон.



Жонга солғон ҳам на создир  
 Элга сўйлаб мен каби  
 Шоири девонаи ишқ  
 Номини олғон ёмон.



1988

## СЕНИНГ ШАЪНИНГ

Ёзиб ўрганмаганман  
 Байрамга қасидалар,  
 Баландпарвоз китоблар  
 Тилимга келақолмас.  
 Юракни қийнаб турган  
 Сўзи бўлмаса агар  
 Шоирни ундаш бекор,  
 Қўлига қалам олмас.

Лекин букун кўнглимда  
 Айтадиган гапим бор,  
 Зафару шодиёна  
 Фақатгина баҳона.  
 Мана, сен рўпарамда  
 Жигарбандим — пахтакор,  
 Кўкрак кериб турибсан  
 Ҳалол, танти, мардона.

Хирмонинг пахта билан,  
 Калбинг ифтихор билан,  
 Кўзларинг баҳтиёрлик  
 Нури билан тўлибдур.  
 Буни мардлик дейдилар  
 Ўз сўзда қарор билан,  
 «Ўзбек иши» дегани  
 Мана бундоқ бўлибдур.

Кексаларнинг сўзи бор,  
Қўлни очиб дуога,  
Ерга қаратма,— дерлар,—  
Икки дунё кўзимни.  
Имонимдан айирма,  
Етказгин муддасга,  
Дўсту душман олдида  
Ёруғ қилган юзимни.

Юзнинг ёруғ бўлгани  
Асли шудир биродар,  
Ғаразгўй ичи куйиб,  
Дўстлар яйраб кулибдур.  
Ўзбекнинг кимлигини  
Билиб қўйисин баъзилар,  
«Ўзбек иши» дегани  
Мана бундоқ бўлибдир.

Эй, сен, фарқ этмагувчи  
Зарпечакдан чаманни,  
Касбошим берилмагин  
Турфа қизиқ гапларга.  
Ҳеч қилиб кўрсатмагин  
Фарҳодга Ёсумонни,  
Ноғора чалаберма  
Тамоша талабларга.

Сен ўзбек меҳнатин ёз,  
Бу замингга деҳқоннинг  
Умиду армонлари,  
Дардлари тўкилибдир,  
Бунда ҳар битта чаноқ  
Қанча азоби жоннинг,  
«Ўзбек иши» дегани  
Мана бундоқ бўлибдир.

Унда бурчнинг фарзи бор,  
Ҳеч кимсадан қарзи йўқ,  
Ери каби бир умр  
Саҳоватга яралган.  
Дўстликка мангу содик,  
Имонининг дарзи йўқ,  
Матонатга туғилган,  
Жасоратга яралган.

Мен юрак сўзин айтдим  
Зафар тўйи баҳона,  
Омон бўл, она юртим,  
Ғурурим, шараф шоним.  
Довонлардан ўтабер  
Адил, шаҳдам, мардона,  
Оқ бўлсин, ойдин бўлсин  
Йўлинг, улкан карвоним.

*1988 йил ноябрь*

## САВАҒИЧ

Савағич пахтага  
Дейди:  
— Қалайсан?  
Кўлимга тушдинг-ку,  
Шошмай тур, сени...  
Савағич!  
Пахтани нега савайсан?  
Пахтада не гуноҳ?  
Савала мени!

Пахтанинг тани оқ,  
Юмшоқ бадани.  
Нозик-ниҳол экин,  
Шафқатинг қани?  
Ахир менинг юртим  
Пахта ватани,  
Пахтада не гуноҳ?  
Савала мени!

Кеча беҳи эдинг,  
Қуридинг, сўлдинг,  
Қирқилдинг, йўнилдинг,  
Савағич бўлдинг.  
Сен бунга пахтани  
Айбдор деб билдинг,  
Пахтада не гуноҳ?  
Савала мени!

Боғ-роғлар кесилса,  
Пахтадами айб?  
Яйловлар бузилса,  
Пахтадами айб?  
Гўдаклар эзилса,  
Пахтадами айб?  
Пахтада не гуноҳ?  
Савала мени!

Куни кеча эди...  
Сулув келинчак  
Соянгда қурганча  
Рангин беланчак  
Бола аллаларди...  
Сўлди у чечак...  
Пахтада не гуноҳ?  
Савала мени!

Қўш хивич, чийиллаб  
Ғазабкор, хунхор,  
Бечора пахтага  
Еткурма озор.  
Сувинг ичган бўлса  
У сендан ночор,  
Пахтада не гуноҳ  
Савала мени!

Гарчи шеърда номи  
Олтину маржон,  
Турупдан беқадр,  
Шолғомдан арzon.  
Деҳқон шу арzonга  
Йил бўйи сарсон.  
Пахтада не гуноҳ?  
Савала мени!

Мени ур, пахтани  
Куйлаган менман.  
Эртаю кеч уни  
Ўйлаган менман,  
Оlamга мақтаниб  
Сўйлаган менман,  
Пахтада не гуноҳ?  
Савала мени!

Уни мадҳ этмоқнинг  
Моҳири ўзим,  
Мадҳимга ишондим  
Охири ўзим,  
Турғунлик даврининг  
Шоири ўзим,  
Пахтада не гуноҳ?  
Савала мени!

Элим бурч деганда  
Пахтани билган,  
Зарур бўлганида  
Кўрпадан шилган,  
Битта чаноқ учун  
Одам отилган,  
Пахтада не гуноҳ?  
Савала мени!

Жоци сабил бўлган  
Инсонлар учун,  
Етимлар кўксидা  
Фифонлар учун,  
Афсус, надоматлар,  
Армонлар учун  
Пахтада не гуноҳ?  
Савала мени!

Кўракдек оғизни  
Юмганмиз ҳар дам,  
Очмасам чаноқдек  
Дилни энди ҳам  
Мен нечук шоирман,  
Мен нечук одам?  
Пахтада не гуноҳ?  
Савала мени!

*1988 йилнинг ноябрин*

### ТЎРА ЙИГИТ

Тўра йигит, ажаб рафторинг бўлак,  
Сувратинг бўлакдур, асроринг бўлак.

Менинг ошноларим девоналардан,  
Парвоналар сенда, дўст-ёринг бўлак.

Лутфинг бўлакчадир, хулқинг бўлакча,  
Белдан пастинг бўлак, юқоринг бўлак.

Бизнинг эҳтиёжга на парвойинг бор?  
Дўконинг бўлакдир, бозоринг бўлак.

Ҳар кас охиратда хоки туробдур,  
Ушанда ҳам сенинг мозоринг бўлак.

«Элга дастёр»лигинг ўзи латифа,  
Хизматингда юзта дастёринг бўлак.

На ишчи, на дехқон, на зиёлисан,  
Мустақил синфсан, қаторинг бўлак.

Эл бошига ёққан қор сенга ёғмас,  
Уйинг бўлак, томинг, деворинг бўлак.

Тилдаги тилагинг ошкораликдир,  
Ботанда, аёнки, шиоринг бўлак.

Халқ ўз сардорларин сайлар, лек сенинг  
Орзу қилган қаттол сардоринг бўлак.

Эрк юрти бўлгай юрт, аммо сен истар  
Тикан сим ўралган диёринг бўлак.

1988

## МАТМУСА ВА ҮФРИЛАР

Савдо қилиб Матмуса  
Қайтар экан йўлига  
Тушиб қолди шаҳарлик  
Ўғриларнинг қўлига.

Ечинтирилар аввал  
Сўнг дўппослаб урдилар.  
Ўчсин дея овози  
Карнай чалиб турдилар.

Шу-шу кўп йил Матмуса  
Бу шаҳарга қайтмади.  
Ичга ютди аламин  
Ҳеч кимсага айтмади.

Айтса нима, эл фақат  
Кулги қилар эрмаклаб,  
Қариганда ниҳоят  
Набирасин етаклаб

Матмуса яна ўша  
Шаҳар сари йўл олди.  
Бу сафар катта тўйнинг  
Устидан чиқиб қолди.

Ғат-ғат карнай, ноғора  
Такатумни уради.  
Матмусадан набира  
Бу нима, деб сўрарди.

Бобо айтар: бу ишни  
Мендан сўрма, болажон,  
Бир шўрликни ҳойнаҳой  
Қилмоқдалар чалажон.

Дўстлар кулманг, бу ҳикмат  
Матмусадан қарироқ,  
Ноғораю карнайдан  
Юринг доим нарироқ.

1988

## МАТМУСАНИНГ ҚЎШИҒИ

Беиш қолди Матмуса,  
Энди не қилув керак?  
Бир товуққа албатта  
Ҳам дону ҳам сув керак.

Бекор қолсанг ёстиқ ҳам  
Ёнбошингга ботади.  
Телевизорга токай  
Термилганча ётади?

Оинаи жаҳонда  
Куйламаган оғиз йўқ.  
Ўйлаб кўрса ўзидан  
Ўтадиган ҳофиз йўқ.

Ўйлади, аввал бошни,  
Сўнг ёнбошни қашлади.  
Тўртта одам йиғилса  
Қўшиқ айтабошлади.

Эшитарми одамлар,  
Эшитмасми, иши йўқ?!  
«Боғ аро» ни кўтарар,  
Бас, дейдиган киши йўқ.

Ўзи бўлар маҳлиё  
Ўзи айтган куйларга.  
Таклиф бўлса, бўлмаса  
Бораверар тўйларга.

Матмуса келған ердан  
Қочар бўлди одамлар,

Тунлар қулоққа ёстиқ  
Босар бўлди одамлар.

Оқсоқоллар дедилар:  
Бир иложни ўйлайлик.  
Матмусани қишлоққа  
Тўра қилиб қўяйлик.

Бўлса катта амалдор,  
Курсиси баланд бўлса:  
Мажлис, қабул, нутқ, сафар...  
Хуллас доим банд бўлса.

Балки қўшиқ айтишга  
Вақти қолмас, улгурмас.  
Амалидан уялиб  
Ҳофизликни эп кўрмас...

Келишдилар, Матмуса —  
Энди қишлоқ тўраси.  
Кўпайиб қолди, кўринг,  
Қадрдони, жўраси.

У курсида ўлтираг,  
Кўлни қўйиб белига.  
Яна ҳам қийин бўлди  
Донишқишлоқ элига.

Кимки бирор иш билан  
Ҳузурига киради —  
Матмуса арз эшитмас,  
Қўшиқ айтиб беради.

Чидаб сукут сақлаган  
Марҳаматга эш бўлур.

Қўшиғини мақтаган  
Албат иши беш бўлур.

Оқибат Матмусанинг  
Касали баттар бўлди.  
Саҳар бошлаб ашула  
Кечгача айтар бўлди.

Оқшомлари гузарда  
Авжни олиб туради.  
Эшитсанг-ку хўбу хўб,  
Эшитмасанг — уради.

Тўра бўлгач, бошқа хил  
Овозларни йўқотди.  
Менга тақлид қилди, деб  
Хўроларни йўқотди.

Донишқишлоқда энди  
Бошқа бирор қўшиқ йўқ.  
Биргина Матмусанинг  
Қўшиғига тўсиқ йўқ.

Одамлар ижирғаниб,  
Қарғаб, қулоқ солдилар.  
Илож қанча, охири  
Ўрганиб ҳам қолдилар.

Ҳатто қўмсаб, ноёб деб,  
Сўйлар бўлди халойик.  
Матмусага ўхшатиб  
Куйлар бўлди халойик.

Қарсак, олқиши, мадҳия  
Авжга чиқиб басма-бас,

Халқ деди: бизга энди  
Бошқа қўшиқ керакмас.

Ҳаммамиз бу қўшиқнинг  
Фидойиси бўлармиз.  
Уни айтиб яшадик,  
Уни айтиб ўлармиз.

Алқисса, булбули йўқ,  
Хўрози йўқ ул маъво —  
Донишқишлоқда ҳамон  
Янграп ёлғиз бир наво.

1988

## ХАЛҚ НОИБЛАРИГА

Сизни халқ танлади,  
Қилмади суюк,  
Балки елкангизга юқ ортди буюк.  
Сайлаб олди мардлар ичра мардини,  
Адо қиласизми мардлик шартини?  
Эртага чиққан чоғ баланд минбарга,  
Айта оласизми юртнинг дардини?  
Азалий одатни қиласизми ё,  
Ялпи қўл кўтариб келасизми ё,  
Ноиблик нишонин таққач кўкракка,  
Қулоқ солиб кўринг бир бор юракка.  
Ул юрак тубида эл ғамидин ғам,  
Доғидин кўнгилда доғингиз борми?  
Агар керак бўлса Президентга ҳам  
Эътиroz қилмоққа чоғингиз борми?  
Айни жасоратни кутар муҳаққақ  
Орtingизда турган кўп миллионли халқ.

Хўп деб қайта берманг, нега, деб айтинг,  
Биз ҳам иззат нафсга эга деб айтинг.  
Ҳиммат билан туриңг, бор денг арзимиз,  
Тўлаб қўяйлик денг бўлса қарзимиз.  
Дўстликнинг шартига риоя бўлсин,  
Ҳеч ғубор тушмасин дил кўзгусига.  
Камтар улушимиз, айтинг, қўйилсин  
Жаҳон бозорининг тарозусига.  
Не бу жаҳон узра солмак кўпкари  
Шарт эса кетмаслик қозиқдан нари.  
Асли инқилобдан не эди мақсад?  
Йўқсилликми абад, хорликми абад?  
«Йўқсиллар бирлашинг» деб ҳайқирган он  
Наҳот йўқсил бўлсиң дедик бу жаҳон?  
Феълимиз шунчалар торми деб сўранг,  
Бу мулкнинг эгаси борми деб сўранг!  
Сиз ёлғиз ўзбекнинг дардин айтмангиз,  
Азага боргандек йиғлаб қайтмангиз.  
Ахир Эстонда ҳам ўша оғриқдир.  
Рус қишлоғи дарди биздан ортиқдир.  
Ерда қиладиган ишимиз кўп, денг,  
Ҳадеб отаберманг осмонга тўп, денг.  
Тобакай фалакка саройлар қуриб,  
Само пойгасида от суражакмиз.  
Қултум тоза сувга зор бўла туриб  
Заримизни кўкка совуражакмиз?  
Тобакай миллиардлар элдан беизн  
Ҳарбнинг ариғига оқиши керак?  
Бизни босиб олмас капитализм,  
Босиб олса, ахир, боқиши керак!  
Сизга гап ўргатмак шоир ишимас,  
Ҳар бирингиз Арбоб, ҳар бирингиз Шахс!  
Дардни айтган билан дил бўлмас халос,  
Гапни кўп гапирдик, иш қолди, холос,  
Қарорлардан бўлдик, иложлар керак,

Ҳасратлардан тўйдик, ривожлар керак.  
Сизни эл танлади,  
Қилмади суюқ,  
Балки елкангизга юқ ортди буюқ.  
Сиз элнинг эгилган қаддин кўтаринг,  
Ноиб деган номнинг қадрин кўтаринг.

1989

## ИЛЬЗА ХОНИМ

*И. Л. Сиртаутасга*

Она тилим!  
Меҳринг бу қадар  
Үртагувчи экан жонимга.  
Асири бўлиб лолу мусахҳар  
Термуламан Ильза хонимга  
Термуламан Ильза хонима  
Кўзларимга ишонмай ҳайрон.  
Амриқолик хушрўй олима  
Сўзлар эди ўзбекча равон.  
«Сиаттлга хуш келибсизлар,  
Олис юртдан йўл босиб йироқ.  
Танишиналар, бу йигит, қизлар  
Ўзбекчадан олмоқда сабоқ...»  
Дастурхонда парварда, пашмак,  
Хандон писта, қип-қизил ширмой.  
Атлас кийган сулув келинчак  
Одоб билан узатар кўк чой.  
Мен эс-ҳушим йиғмасдан ҳали  
Қулоғимга дилбар куй етди.  
Накамури — япон гўзали  
«Тановор»га чарх уриб кетди.  
Она юртим!

Мехринг бу қадар  
Азиз экан дилу жонимга.  
Термулганча лолу мусаҳҳар.  
Сўз айтаман Ильза хонимга:  
— Минг ташаккур ўзбек элидан,  
Яшанг, дунё тургунча туринг.  
Илтимосим, шогирдлар билан  
Диёrimга ташриф буюинг.  
Келинг, сизни Она юрт учун  
Фидолар бир тинглаб қувонсин.  
Бу қувончдан лекин бир умр  
Жудолар ҳам тингласин, ёнсин.  
Ўз элати меҳридан дилин  
Ёт тутганлар сизни эшитсин.  
Ўз ютида ўз она тилин  
Унутганлар сизни эшитсин.  
Сизни кўрсинг жаҳолат, ғафлат  
Уйқусида, ётган бандалар.  
Ўз қадрини унвон, манфаат  
Бозорида сотган бандалар.  
Амалдор зот ҳамқишлоқларга  
Ташлагандек баланддан назар,  
Чиққан чоғи баланд минбарга  
Ўз тилидан қилганлар ҳазар,  
Умри ўтиб Ўзбекистонда  
Ассаломни билмаганлар ҳам,  
Икки оғиз бизнинг забонда  
Арзу иншо қилмаганлар ҳам,  
Илмдаю маҳкамаларда  
Лойик унга жой бермай ҳалол.  
Ўзбек тилин эски шаҳарда  
Бозор тили қилганлар хаёл —  
Ильза хоним,  
Сизни эшишиб,  
Хатоларин билсалар эди.

Андак тилнинг қадрига етиб,  
Сал инсофга келсалар эди.  
Эй сиз, доно устоз олимам —  
Олис юртда муnis йўлдошим,  
Сизга эгай подшоларнинг ҳам  
Хузурида эгмаган бошим.

1989

## ИЗТИРОБ

Бетавфиқ раҳбарни сўкканим учун  
Уч йил ётар бўлсан ётганим бўлсин,  
Унинг йўқ обрўсин тўкканим учун  
Тўлов берсан борим, сотганим бўлсин.

Халқимга қадрингни бил десам агар,  
Кураш, хақни ошкор қил, десам агар,  
Бу қутқу аталса давлатга зарар  
Қанча азоб бўлса тортганим бўлсин.

Амалдор дер эса, тузум — мен ўзим,  
Фармон фармонимдир, сўз менинг сўзим,  
Мен бундай тузумдан ўгириб юзим  
Тамом жиноятга ботганим бўлсин.

Тифлисда халқ узра танқ юборган зот  
Шаънин қилар бўлса қонун эҳтиёт,  
Ўша зот коммунист бўлса, мен, ҳайҳот,  
Фирқа дафтаримни отганим бўлсин...

апрель 1989

## ТУРКИСТОН БОЗОРИ

Бир дўкон қурмоқ керакким,  
Мақсади сотмоқ эмас,  
Икки ойда бой бўлай деб  
Элни алдатмоқ эмас.

*Эргаш УЧҚУН*

Америкалик ўзбек шоири

Бир бозор орзу қилурмиз,  
Номи «Туркистон» бўлур,  
Машриқу Мағриб элида  
Шуҳрати достон бўлур,  
Ул бозор ичра бари  
Аҳли жаҳон меҳмон бўлур,  
Ўзбеку туркман, тоҷик,  
Қирғиз, қозоқ мезбон бўлур,  
Бир томошо қилган одам  
Лол бўлур, ҳайрон бўлур.  
Ул Бродвей кўчасида,  
Ё Бруклен ёнида,  
Шуъбаси Лондон, Парижнинг  
Марказий майдонида,  
Гар насиб этса кезармиз  
Деҳли Туркистонида,  
Тол таги чойхона-ю  
Чойхона дастурхонида  
Бобур орзу айлаган  
Қовун ва ширмой нон бўлур.  
Не бўлур пештахталарда?  
Шоҳи атлас, беқасам.  
Чуст пичоқ бергай, Бухоро —  
Атласу, туркман — гилам,

Оқ момиқ қирғизча қалпоқ,  
Тожикий зар дўппи ҳам,  
Жун чопон оқмуллача,  
Жон роҳати, силлиқ, шинам,  
Барча тилларда Навоий  
Шеъридан девон бўлур.

Келса ким ҳиндdir, хитойdir  
Яхши ниятлар билан,  
Бир пиёла чой тутамиз  
Хуш назокатлар билан,  
Бир-бировга боқмас эллар  
Кин, адоватлар билан,  
Бор масалким, ҳам зиёрат,  
Ҳам тижоратлар билан  
Иншооллоҳ бормоғу  
Келмоқ яна осон бўлур.

Не ажаб, биз бошласак,  
Улгайса кундан кун бозор,  
Ёнимизга «Кавказ» у  
«Болтиқ» келиб турса қатор,  
Оқса Хадсон ёнида  
Тошқин Дунай ҳам мавжкор,  
Бу жаҳонда бахтиёр ким?  
Бағри кенглар бахтиёр,  
Асли бозормас мурод,  
Дийдор учун имкон бўлур.

Бу ният чинdir,  
Деманглар, шоирона бир хаёл.  
Икки улкан юрт учун  
Бундоқ бозордан не малол?  
Манфаат аввалда дўстлик,  
Сўнг рақобатдир ҳалол,

Шеъру санъат аҳлига йўқ  
Кўй, қўшиқдан ўзга мол,  
Бизга ҳам ул гўшада  
Чорпсяю айвон бўлур.

Бир муҳаммас битди Эркин  
Шоир Учқунга жавоб,  
Биз ният қилдик, бу ният  
Эзгудир, олижаноб,  
Ҳар замон шоир ниноси  
Оlam аҳлига хитоб,  
Бу жаҳон бозорида  
Элу элатлар беҳисоб,  
Турфа гуллардан у шояд  
Бир бутун бўстон бўлур.

## КЎРСАТКИЧ БАРМОҚ

Умринг таҳликада, қўрқиб яшадинг,  
Ёнмадинг, тутундек бурқсиб яшадинг.

Бармоқларинг ичра баридан кўпроқ  
Сенга хизмат қилди кўрсаткич бармоқ.

Лабга босдинг, шифтга ишора қилдинг,  
Кўпни тилсиз қилдинг, бечора қилдинг.

Бир замон кўрсаткич бармоқни қўллаб  
Омон қолдинг, дорга дўстингни йўллаб.

Энди ошкорликдан куйиб турибсан,  
Бармоқни чакканга қўйиб турибсан.

Сирсиз ҳаёт сенга бағоят мушкул,  
Юрагингда яшар итоатли қул.

Тилайсан, Берия тирилиб келса,  
Норасмий гуруҳлар қирилиб кетса.

Бу кунлар тилларга бўлса-ю қармоқ,  
Яна кучга кирса кўрсаткич бармоқ.

1989

## АЖАБ ЭРМАС

(Завқиёна)

Бу кунлар катта йўлда  
Бир довон бўлса ажаб эрмас,  
Муқаррар ортида йўл  
Кенг, равон бўлса ажаб эрмас,  
Ватанга сидқу имон,  
Имтиҳон бўлса ажаб эрмас.  
Фаровон юрту олам,  
Тинч жаҳон бўлса ажаб эрмас,  
Биз этган барча орзулар  
Аён бўлса ажаб эрмас.

Не ишлар кечди бошлардин,  
У кунлар қайтмагай зинҳор,  
Улуғвор танга энди  
Номуносиб тўн бичилмас тор,  
Унут бўлгай чекилган дард,  
Жароҳат, кулфату озор,  
Кўнгилда қолмагай ҳеч доғ,  
Ғубордан тоза бўлмоқ бор,  
Булут даврон шамолида  
Ниҳон бўлса ажаб эрмас.

Сен эй, сен она юртим,  
Кўҳнаю ёш Ўзбекистоним,

Ҳамиша сен ўзингсан  
Боиси ашъору достоним,  
Ғурурим, номусим, шодлик, ғамим,  
Ободу пайҳоним,  
Кўтар бошигни мағур,  
Ҳақлисан, шавкатли дехқоним,  
Бошингда шиша янглиғ  
Осмон бўлса ажаб эрмас.

Қадим туркий мақол бор:  
Бел қолар, беткай кетар, дерлар,  
Умидли бу жаҳонда:  
Эл қолар, беклар кетар дерлар,  
Қолар дўстлик, садоқат,  
Таънаю кеклар кетар, дерлар,  
Оқар оққувчи дарё,  
Хас-чўпу чирклар кетар, дерлар,  
Бу кунлар эътиқодга

Имтиҳон бўлса ажаб эрмас.  
Яқин икки мингинчи йил,  
Ёргуф юз бирла киргаймиз,  
Саховат тўла дастурхон,  
Нону туз бирла киргаймиз,  
Салим имон аталган  
Йўлчи юлдуз бирла киргаймиз,  
Ҳақиқатга, адолатга  
Очиқ кўз бирла киргаймиз,  
(Ки Завқий орзу этган  
Замон бўлса ажаб эрмас),  
Етиб етмишга Эркин  
Навқирон бўлса ажаб эрмас.

1989

## КЕРАК

Бизнинг шифокорлар инсондаги ул  
Руҳий олам билан бўлгунча машгул,  
Ўттиз йил бор экан, ҳозирча маъқул —  
Касалхоналарга етти қопдан кул,  
Ўнтадан кинначи хола керакдир.  
Ошхоналарда то еб бўлгунча ош,  
Вақтинча белгилаб чўнтақ пул — маош,  
Териб бермоқ учун сумалакка тош,  
Баҳор мавсумида элликтадан ёш,  
Оёқ қўли чаққон бола керакдир.  
Госпланга эса бозор аҳволин  
Айтиб турмоқ учун тўрт-беш йил олдин —  
Режа қилмасин то ўтган аср молин —  
Олий малакали етмишта фолбин,  
Келажакни айтиб турувчи керак.  
Шаҳар транспортига ва ҳайратомуз,  
Ёз ойлари тандир, қиши ойлари муз  
Квартиralарга тегмасин деб кўз,  
Шаҳар Советига бир минг етти юз  
Исириқ тутатиб турувчи керак.

1989

## ТРАМВАЙДА

Тунда трамвайдага сархуш ўспириин  
Тинмай ҳайдовчига ёлворар эди.  
Ана у кўчага юз қадам киринг,  
Уйим ўша ерда, жон ака, дерди.

Бу — трамвай, дерди ҳайдовчи хуноб,  
Сенинг маҳаллангга қандоқ кираман?

Йигит кулоғига кирмасди жавоб,  
— Беш сўм олинг, майли, ўн сўм бераман...

У сархуш йигитга ўхшайди кўнгил,  
Орзулари парвоз этар қайдадир.  
Талпинма, эй кўнгил,  
Сен гапга кўнгил!  
Ахир маконимиз трамвайдадир.

1989 йилнинг апрели.

## ДАРДДОШЛИК

*Иван Драчга*

Ўзга тил, ўзга урф, ўзга анъана,  
Ўзга табиатли халқлар ўғлимиз.  
Ягона қисматнинг ҳукми-ла яна  
Нечанчи бор ёндош тушди йўлимиз.

Олис Скопьенинг тош кўчалари,  
Шаҳроҳ Хрешчатик, Чорсу, Регистон,  
Тюменнинг, Неванинг оқ кечалари,  
Тонготар сухбатлар... эсла, қадрдон.

Бир-бировга очдик дил сиримизни,  
Баҳсларга ҳеч замон нуқта қўймадик.  
Йироқда соғиндик бир-бирилизни,  
Дийдор кўришганда сира тўймадик.

Бизни ошно этган қалбdir шеърпааст,  
Элликда кўнгилдан кетмаган ёшлиқ.  
Алвонга ёзилган шиорлар эмас,  
Юракка битилган буюк дарддошлиқ.

Етти ёшда әдик қирқ учинчи йил  
Биринчи синфга қўйғандик қадам.  
Она диёргингни маҳв этган қотил  
Ўқидан Киевда йиқилди отам.

У пайт биз оч, юпун, кўзимиз дардлик,  
Гўдак армонимиз, ўйимиз билан  
Бошоқ териб, пахта чопиқ қиласардик  
Кетмонга етмаган бўйимиз билан.

Ўша пок болалик кетди қайларга?..  
Эй, сен, битилмаган ўлмас достоним —  
Малласоч, мовий кўз болакайларга  
Она бўлган менинг Ўзбекистоним.

Йиллар ўтди, бизлар улгайган каби  
Улғайди ёнма-ён бизнинг қардошлиқ.  
Тошкент фалокати, Чернобиль ғами  
Кўнглимизга солди яна дардошлиқ.

Оlamda не қудрат бордир, аслида  
Эллар бирлигидан кўра кучлироқ?!  
Унга битсам дейман улуғ қасида  
Баландпарвоз гапдан қўрқаман бироқ.

Қўрқаман, оталар ёди бор қутлуғ,  
Мен не табарруқ сўз қиласардим тортиқ.  
Миллионлар қалбига муҳрланган руҳ,  
Қон билан битилган меҳрдан ортиқ!

Азизим, шоирсан, булар барчаси  
Мендан кўра кўпроқ ўзингга зён.  
Шоир — ўз халқининг юрак парчаси,  
Йўқ, у юрак бўлиб туғилган исён.

Жон риштамиз замин тубида боғлиқ,  
Мовий кўзларингда ошкора кўрдим:  
Ўзбекистон — сенинг кўксингда оғриқ,  
Украина — менинг жафокаш юртим.

Қанча ардоқласам ўрмонларингни  
Гулшан боғларимни шундай суярсан.  
Англайман дилдаги армонларингни,  
Тупроғим дардига сен ҳам куярсан.

Она тилинг учун ғам чекиб дилда  
Нола қилсанг, кўкка учар фарёдим.  
Етмиш етти пуштим сўзлаган тилда  
Сўзлармикин яна етти авлодим?

Мен Киевга учсам йўлимда бесас  
Орол кўзгусида жимиirlар қуёш.  
У Шевченко кўрган мавжли денгизмас,  
У зор қўбузчининг кўзидағи ёш.

Ҳаёт бешафқатдир, вақт эса қаттол,  
Табиатга ўтмас зулму даъволар.  
Биздан мерос қолар наҳотки беҳол  
Нашаванд далалар, сувсиз дарёлар?!

Йўқ! Ҳеч ишонмайман! Имон бор! Халқ  
бор!

Метин иродалик ва олтин бошлиқ.  
Қардошлиқ сидқи бор мангу устивор,  
Бор азалу абад бизнинг дардошлиқ.

Русмиз, молдаванимиз — замин замин  
биттадир  
Ҳиндумиз, испанмиз — биттадир ҳаёт.  
Киприкда томчидек қалқиб турган ер  
Буқун сену мендан кутмоқда нажот.

Насибамиз, шудир, қисмат йўқ бўлак  
Чигал, таҳликалик замонамида.  
Бу дардли дунёниг куйчиси бўлмак  
Бор экан, азизим, пешонамида.

Куйимизни куйлаб, созимиз чалиб  
Ўтармиз, қолажак курраи азим.  
Биз бир туп каштану мажнунтол бўлиб  
Боқий дардошликка қиласмиз таъзим.

1989

## УНТЕР ПРИШИБЕЕВ

Жаноб Пришибеев, сўз яна сизга!  
Яна кўчаларда қўр тўкиб юринг.  
Худо қувват берсин томоғингизга,  
«Тарқал, эй халойиқ!» дея буоринг!

Қаранг, во ажабо, бу bemаза халқ  
Яна эркинликни истаб қолибди.  
Жонига текканмиш ҳокими мутлақ,  
Бундоқ хом хаёлни қайдан олибди?

Келиб нуқта қўйинг бу орзуларга  
Халойиқ зотини майдондан қувинг,  
Ҳақиқат қаерда — айтинг уларга,  
Адолат нимадир, кўрсатиб қўйинг.

Гарчи Россиядан чиққансиз, жаноб,  
Унда сизга жой йўқ, у ер ёмондир.  
Халқи бетавозе, шаккок, беодоб,  
Сизга муносиб жой бизнинг макондир.

Унтерлар жонига оро бу маъво,  
Халқи мусичадек юввош ва увол.  
Минг бор жам бўл деса жам бўлмас,  
аммо  
Бир бор, тарқал, деса тарқалар дарҳол.

Жаноб Пришибеев, марҳамат бизга,  
Қадрингизга етиб асраб суюйлик.  
Поёндозлар тўшаб оёғингизга,  
Юксак мартабалар бериб қўяйлик.

Токи қайта чўксин узоқ сукунат,  
Токи эл бўғзидан чиқмасин нафас.  
Сокин кўчаларда сиз гоҳи фақат  
«Тарқал, эй халойик!» деб турсангиз  
бас.

1989

## СУЛТОНМУРОД

Султонмурод давлатманд одам эди. Саҳий, маърифатли бой эди. Совет ҳокимияти унинг мол-мулкини мусодара, ўзини элдан бадарға қилди. Бор йўғидан, ватанидан мосиво бўлиб узоқ элларга жўнаб кетар экан, Султонмурод алам ичида шундай сўзларни айтди.

Шафқат этмай бахтим қаро қилганлар  
Шафқатга зор, бахти қаролар бўлгай.  
Мени ватанимдан жудо қилганлар  
Ватанда ватандан жудолар бўлгай.

Ҳеч қачон, ҳеч ерда ҳеч кимсага, бас,  
Талаб олган моли буюрган эмас,  
Ер-сувимни олганинбакор ул кас  
Ер устида ерга гадолар бўлгай.

Соҳиблик мулк — обод, соҳибсиз —  
вайрон,  
Эгасиз биядан соғилар айрон.  
Юз йил «Хўжасизлик қайдан?» деб  
ҳайрон  
Халойиқ тутгани яқолар бўлгай.

Бунда гаплар кўпу ишлар бўлгай оз,  
Эл маъруза егай ва кийгай қофоз,  
Юртнинг эгалари мудом ваъдабоз,  
Ишларида юз минг хатолар бўлгай.

Ерида заҳр унар бўлгай бу ўлка,  
Жафоларга кўнар бўлгай бу ўлка,  
Камоли беҳунар бўлгай бу ўлка,  
Дўконида ўтмас матолар бўлгай.

Бенамоз, бехудо, бедин бандалар  
Устидан шайтонлар қилгай хандалар,  
Имон, зътиқоди парокандалар  
Бошида кичкина худолар бўлгай.

Ҳукумат! Қотилинг ўзингдан чиқар,  
Адил чинорларинг қўпорар, йиқар,  
Лак-лак сургун қилас, зиндонга тиқар,  
Бошингда туганмас жазолар бўлгай.

Юртбошилар оқил эса ҳойнаҳой  
Эл ҳоли бунчалар бўлмас эдивой,

Инсон бой бўлмаса халқ бўларми бой?  
Саволим авлодга нидолар бўлгай.

Султонмурод шу сўзларни айтиб, отга  
қамчи босиб, Олатоғдан ошиб Қашқарга  
равона бўлди...

1989

## РАИС ВА ШОИР

Пиллакор раиснинг даъвати ила  
Шоир меҳмон бўлгач қишлоққа келиб  
Мадҳ ёзди юксак шеър санъати ила  
Пиллани тиллага қофия қилиб.

Йил ҳам ўтгани йўқ, меҳмондўст раис  
Чорвадор колхозга ўтганин билиб  
У қасида ёзди қалби тўла ҳис  
Туяни бияга қофия қилиб.

Раис ишдан кетди, у энди собиқ,  
Шоир хабар олмас назарга илиб.  
Энди у шеър ёзар услугга содиқ  
Раисни даюсга қофия қилиб.

1989

## УЗОҚҚА БОРМАДИК АНДИША БИЛАН...

Узоққа бормадик андиша билан  
Тил топаолмадик ҳамшиша билан.

Одамзодга дўст ҳам ёв бўларкан тил  
Кўприк бўларкан ҳам ғов бўларкан тил.

Олисга етмасдан ўчди унимиз,  
Чунки бегонага қолди кунимиз.

Гул бўл, тиканак бўл — чаминингда бўл,  
Булбул бўл, қарға бўл — ватанингда бўл.

1989

## ҚҮҒИРЧОҚЛАР

Қўғирчоқ эмасмиз, дердилар аввал,  
Ошкоралак даври бўлиб тобора —  
Энди үлар ўйин кўрсатган маҳал  
Иплари кўриниб тураг ошкора.

1989

## ДАФТАР ЧЕТИДАГИ ЁЗУВЛАР ЧИСТОН

Ул адиб кимдирки, доим  
Катса пинжида юрар,  
Мансабу унвон, мукофот,  
Мулк илинжида юрар.  
Тушса ҳам отдан ва лек  
Ҳаргиз эгардан тушмагай,  
Гар трамвай минса ҳам  
Номер биринчида юрар.

1989 йилнинг декабри

## **БИЗНЕСМЕН СЎЗИ**

Сизлар қуруқликда турган одамлар,  
Биз денгизда сузиб юрган одамлар.  
Хотиржамсиз, сизга ҳавас этамиз,  
Биз бир лаҳза тинсак чўкиб кетамиз.

*1989 йилнинг феврали  
Нью-Йорк*

## **ЖАНЖАЛКАШ**

Унга яқин юрмас ҳеч кимса магар  
Жудолик тиламас шаън, обрўсидан.  
Қўрқаман, ўзини ўзи дўппослар,  
Кўзгуни олиб қўй рўбарўсидан.

*1989 йилнинг апрели*

## **МАТМУСАНИНГ АМЕРИКА ОЧИШИ**

Газета ўқиб ётиб  
Матмуса ўй ўйлади.  
Элни йиғиб эрталаб  
Шундай бир нутқ сўйлади.

Донолар! Сизга айтай  
Ўйлаган бир хаёлим.  
Уни айтишдан аввал  
Бордир битта саволим:

Айтинг, Америкага  
Ким дастлаб қўйган қадам?  
Колумбм? Йўқ! Хитойлар —  
Беш минг йилча муқаддам.

Улар борган кунчиқар,  
Яъни бизнинг томондан.  
Сўнг бу қитъани очган  
Колумб нариги ёндан.

Энди мен сизга айтсам  
Мақсаду муддаони:  
Бизнинг замон ном чиқар  
Иш қилмоқнинг замони.

Киройи донг таратсак  
Дунёга таратайлик.  
Америка очмоққа  
Янги йўл яратайлик.

Киришсак Хитойни ҳам  
Колумбни ҳам йиқамиз.  
Шу жойдан ер кавласак  
Нью-Йоркдан чиқамиз.

Лекин бизлар қазиймиз  
Қишлоқнинг этагидан.  
Шунда тешиб чиқамиз  
Нақ Оқ уйнинг тагидан.

Жаҳонни лол қолдириб  
Шуҳрат олиб қайтамиз.  
Президентни шартта  
Қопга солиб қайтамиз.

Жаҳоншумул инқилоб  
Бундан осон ҳал бўлмас.  
Ер юзида шундан сўнг  
Бою камбағал бўлмас.

Матмусага қарсаклар  
Остида тўн ёпилди.  
Аммо — лекин баъзи бир  
«Мужмал»лар ҳам топилди.

Кимдир деди:— Бу иш зўр,  
Менда фақат бир хаёл:  
Ер дарз кетса, иккига  
Бўлиниши эҳтимол.

Бирор деди:— Биз агар  
Ер шарин тешиб қўйсак,  
Ғўриллаб шамол юрса  
Бўлмасмикин елвизак?

Ва лекин Матмусани  
Ёқлаб кетди кўпчилик.  
Вахима қилганларни  
Боплаб кетди кўпчилик.

Донишқишлоқ шу кундан  
Бошқа ишни ташлади.  
Матмуса айтган жойдан  
Хандақ кавлай бошлади.

Роса терга тушдилар,  
Кун тобида, ер заранг.  
Иш битай деган чоғда  
Сув чиқиб қолди, қаранг.

Ишга тушди пақирлар,  
Бир зум ором бўлмади.  
Кечгача сув тортдилар,  
У ҳеч тамом бўлмади.

Тиришдилар кун бўйи,  
Эрталаб тиришдилар.  
Бўлмагач, бошқа ерни  
Кавлашга киришдилар.

Дониш аҳли чайдир халқ,  
Дониш аҳли кўп шоввоз.  
Ер қазиб, сув чиқариб  
Ўтди кўп қишиш ва кўп ёз.

Бу меҳнатдан кўмилди  
Ярим қишлоқ тупроққа.  
Қолган ярми айланди  
Қурбақазор ботқоққа.

Кўп вақтики, Донишқишлоқ  
Мингқудуқ деб аталар.  
Эл ичида Матмуса  
Мирқуруқ деб аталар.

Лекин у йўлдан қайтмас  
Дер, бу йўл ҳақ йўлидир.  
Халқ уни танлаган, бас,  
Демак, у халқ йўлидир.

Симирамиз сув келса,  
Тош келса кемирамиз,  
Очамиз Америка,  
Сўнг уни емирамиз.

Яқинда у қишлоқдан  
Келди яхши бир хабар.  
Пудратга ўтганмишлар  
У ерда ҳам одамлар.

Бориб кўрдим, шиддат зўр,  
Умид катта, иш катта.  
Ғайрат қилган бир жойдан  
Тешиб чиқар албатта.

1989

## ДАВЛАТ ИШИ

«Мамлакатимизда никоҳга  
асосан Улуғ Октябрь Социа-  
листик революциясидан ке-  
йингина давлат иши деб қа-  
ралди».

«Никоҳ ва оила» китобидан

Икки жон қовушса юлдузлар огоҳ,  
Бу қисмат амридир, чарх гардишидир.  
Ерга тушган чоғи осмоний никоҳ  
Чакана иш эмас, давлат ишидир.

Мана, бахт қушини бошга қўндириб,  
Йигит самоларда қилмоқда парвоз.  
Қувон, севганингни ЗАГСга кўндириб,  
Сен давлат ишини бажардинг, шаввоз!

Чол-кампир етмиш йил тотиб ёнма-ён  
Турмуш лаззатию ғам — ташвишини,  
Қаранг, билмабдилар илк қовушган он  
Адо этганларин давлат ишини.

Давлат иши қандоқ улуғ, мукаррам,  
Авом фаросати етган эмасдир.  
Мирзо Улуғбекни туққан она ҳам  
Давлат ишин адо этган эмасдир.

Ерда инсон наслин қилганда пайдо,  
Мангулик бадарға бўлиб жаннатдан  
Ажаб, Одам Ато ва Момо Ҳаво  
Ҳужжат олмабдилар ҳеч бир  
давлатдан.

Нақадар ғўр экан содда ва қолоқ  
Фақат иңсоф, имон йўлин тутганлар.  
Бизнинг маърифатдан бўлмишлар йироқ  
Қўйди-чиқди нима билмай ўтганлар.

Савод йўқлигидан тушунмай, э воҳ,  
Набиралар кўрган манглайи қора  
Турмуш-тақдир иши, табаррук никоҳ  
Кўнгил иши; дея билди бечора.

Мана, ишқ кўкида қилган парвозинг  
Муҳрлик қофозда энди мустаҳкам.  
Агар бўлмаса шу парча қофозинг  
Сеники эмасдир ўз фарзандинг ҳам.

Гар ўша қофозда битта ҳарф хато  
Ўғил меросхўрмас ота-онага.  
Кирқ йил бирга турган эр-хотин ҳатто  
Ўсиз кираолмас меҳмонхонага.

Никоҳ — давлат иши, баҳтлар ярқироқ,  
Мақтаниб оламга достон этганмиз.  
Тирик етимларнинг сонида бироқ  
Америкадан кўп ўтиб кетганмиз.

Наҳот буни этган инқилоб ижод!  
Мана бу гўдакнинг чиқмасдан тиши  
Муниса онанинг меҳридан озод,  
Унинг тарбияси — давлатнинг иши.

На ишчида дастгоҳ, на деҳқонда ер,  
На олимда бордир илм ташвиши.  
Экмоқдир, ўрмоқдир, сотмоқ.

олмоқдир —

Давлатнинг ишидир, давлатнинг иши.

Биз оламга ҳайрон, бизга-чи олам,  
Бир ажиб турфа уй тиклабмиз букун.  
Бу уйда ҳаммамиз кичкина одам,  
Давлат жавобгардир ҳаммамиз учун.

Сен бойиб қолмассан тўккан билан тер,  
Ўлмассан ястаниб ётсанг мабодо.  
Давлат бамисоли улкан Гулливер  
Митти лиллипутлар ватани аро.

Миттиларга хосдир виқор ва савлат,  
Хаёлда Ер юзи хўжаларимиз.  
Отамиз — Давлатдир, Онамиз —

Давлат,

Бизлар инкубатор хўжаларимиз.

Лекин ким қайғуран очмизми ё тўқ?  
Азизим, бефойда даъводан кечгил,  
Давлат деган сўзнинг бош оёғи йўқ,  
Давлат — бу ҳаммамиз, давлат — бу  
хеч ким.

Кўнглим орзу қилар танҳо осойиш,  
Менинг ҳам биргина хоҳишам бўлсин.  
Ақалли ёримни бағримга босиш  
Давлат иши эмас, ўз ишим бўлсин.

1989

**БЎРИ ЧАҚИРГАН  
МАЖЛИС ВА БЕОДОБ  
ОТ ҲАҚИДА ЛАТИФА**

Бўрининг қорни тўйди,  
Гўшт ҳам тегди жонига.  
Эчки, қуён, от, қўйни  
Чақирди у ёнига.

Деди: ҳозир тўқ пайтим,  
Фойдаланиб қолинглар.  
Менга дашномлар айтиб,  
Танқид қилиб олинглар.

Бугун минбар сизники,  
Фуқаролик бизники,  
Сизни тўрга чиқариб  
Пастда бўлай мен ғарив.

1987

Қани бошла, қуёнбой,  
Бир эшитай сўзингни.  
Ботирсан-ку, бийронбой,  
Кўрсатиб қўй ўзингни.

Ўртага чиқди қуён,  
Авайлаб ўз жонини.  
Тинглади бўри полвон  
Қашлаганча қорнини.

Қуён деди: «Минг раҳмат,  
Менда ҳеч шикоят йўқ.  
Сиздек олиймарҳамат  
Соҳиби иноят йўқ.

Мен қулингиз на дерди,  
Сизга фидодир жоним...»  
Бўри хурсанд ҳайқирди:  
— Баракалла, қуёним.

Бунча ширинсан, оқил,  
Чидаш қийин, не дейман.  
Ҳозир тўқман, тонгда кел,  
Наҳорга сени ейман.

Қуён кетди бош эгиб,  
Мунғайганча дилхаста.  
Сўнг қўйга навбат тегиб  
Минбарга чиқди аста.

Деди: Ҳечвакт ҳеч бўри  
Биздан ҳол сўрган эмас.  
Минбар бериб, жой тўрин  
Муносиб кўрган эмас.

Бу обрў, бу ҳурматдан  
Мен теримга сиғмадим.  
Бундай зўр марҳаматдан  
Таъсирланиб йигладим.

Бизлар мўмин, маъқул эл,  
Раҳм эт, ўзга не дейман.  
Бўри деди: индин кел,  
Сени тушликка ейман.

Қўй кўз ёш тўқди баъраб,  
Исён қилмади лекин.  
Кетаркан маъюс қараб,  
«Раҳмат» деб қўйди секин.

У кетгач келди навбат  
Узунсоқол эчкига.  
Унга тегди таклиф хат  
Пайшанба кун кечкига.

Ниҳоят охирги гап  
Навбати отга етди,  
У бўрини мўлжаллаб  
Жағига чунон тепди.

Олов сачраб кўзидан  
Бўрида жон қолмади.  
Кетганича ўзидан  
Қайтиб туралмади.

Ҳамон унумас отнинг  
Бу ишин ва дер ҳар вақт:  
— Мендек демократнинг  
Падарига минг лаънат.

Бемаъни мажлисга мен  
Икки дунё қайтмайман.  
От — беодоб, от ўлсин,  
Зиёфатга айтмайман.

Лекин унга тан бериб,  
Ичида «қойил» деди.  
Қуён, эчки ва қўйни  
Айтган вақтида еди.

1989

## УЧКЕКЕН БОЗОРИДА

Бир куни қиши чилласида,  
қаҳратоннинг қорида  
Сайр этиб юрдик учовлон  
Учкекен бозорида.

Учкекенини биз кўрибмиз,  
Сиз у ён қўйманг қадам  
Осилиб ўлмай десангиз  
Нарх-навонинг дорида.

Битта кўйлак битта минг сўм,  
Поча пўстин ўнта минг,  
Учкекенга ёрин элтсин  
қасди борлар ёрида.

Учкекенда бор харидор  
Бенажот, ҳайрону лол,  
Зўр такаббур аҳли чайқов --  
Феълида, атворида.

Гар бозор шу бўлса бозор —  
Эл учун озор экан.

Учкекендан қочдик учков  
Ақлу хушнинг борида.

*Есентуки,  
1990 йилнинг январи.*

## МАТМУСАНИНГ ҲАЙКАЛИ

Матмуса — буюк одам!  
Матмуса зўр саркордир!  
Унга, тирик бўлса ҳам  
Ҳайкал қурмоқ даркордир!

Келишдилар донолар.  
Ташаббускор кўп эди.  
Матмуса-чи?  
У — камтар,  
Йўқ демади, хўп деди.

Жуда катта шаҳардан  
Чақирдилар устани.  
Иш бошланди саҳардан,  
Ҳа, яшавор!  
Бос, қани!

Доноларда зўр ғайрат,  
Доноларда куч катта.  
Лекин улуғ ҳаракат  
Осон бўлмас албатта.

Кимнидир харсанг босди  
Кавлаганда тагидан.  
Кимдир аррада кесди  
Ёғоч деб билагидан.

Қоришмада бир доно  
Тиззадан ботиб қолди.  
Ботса майли-я, аммо  
Сементда қотиб қолди.

Барибир денг минг олқиши,  
Зафар қайда чекмай жон?  
Саратон бошланган иш  
Хуллас битди қаҳратон.

Қийқириқ, ҳай-ҳай билан  
Майдонга эл сочилди.  
Ғата-ғут карнай билан  
Кўринг, ҳайкал очилди.

Сиз бундоқ ажиб тасвир  
Кўрмагансиз жаҳонда.  
Матмуса тураг мағрур  
Яхтак, узун иштонда.

Халойиққа кўрсатиб  
Бахт-саодат йўлини,  
Полвон турар узатиб  
Машриққа ўнг қўйини.

Чап қўлида ушлаган  
Тақясини ғижимлаб.  
Ёнида чайнаб юган  
Эшак турар гиҗинглаб.

Белбоғида осиглиқ  
Носқовоғи ярашган.  
Ҳаммадан ҳам попуклик  
Иштонбоғи ярашган.

Таърифи адо бўлмас,  
Ҳамма лолу ҳайратда.  
Лекин бехато бўлмас  
Зўр асар ҳам албатта.

Кўлда такя — кўп улуғ,  
Уста уни дўндирган.  
Лек қўлдаги эсда йўқ,  
Бошига ҳам қўндирган.

Пойафзал жуда яхши,  
Фақат озгина янглиш —  
Бир оёғида — махси,  
Бир оёғида — калиш.

Хўп ўхшаган эшак ҳам,  
Бордир андак чатоги:  
Қулоғи биттага кам,  
Биттага кўп сёғи...

Буларга аҳли дониш  
Қилгани йўқ эътибор.  
Чунки асосий янглиш —  
Бошқа, улар кўп ҳушёр.

Ҳаммамизга жон ширин,  
Ахир шафқат керак-да.  
Ҳаво совуқ, изгирин,  
Нега ҳайкал яхтақда?

Шу холатда мисли шам  
Совуқда турса уч кун,  
Матмуса ҳам, эшак ҳам  
Ҳаром ўлиши мумкин.

Муҳокама вақтида  
Матмуса ҳам бор эди.  
У йишончу аҳдида  
Махкам, устивор эди.

Деди қатъий ва кескин:  
Қайтадан қурмоқ керак!  
Ҳайкал устига пўстин,  
Бошига қалпоқ керак.

Эслади у жун пайпоқ,  
Пахталик шимини ҳам.  
Деди қилинг қалинроқ  
Эшак тўқимини ҳам.

Эл — ботир, элга балли,  
Эл ҳужумга ташланди.  
Матмусага ҳайкални  
Қайта қуриш бошланди.

Иш бўлмади озмунча,  
Кўплар бўлди қаҳрамон.  
Янги ҳайкал битгунча  
Ёз ҳам келди — саратон.

Мана, қуёш ўт пуркар  
Шиддат билан бир ёқда.  
Бир ёқда ҳайкал турар  
Поча-пўстин, қалпоқда.

Халқ кулар бу алфоздан,  
Қаҳ-қаҳ, мазах битмайди.  
Барча дер бир овоздан:  
Бунақаси кетмайди.

Аввалгиси асли ғўр,  
Хатоси бир қоп эди.  
Аммо ўша эди зўр,  
Ўша бизга боп эди.

Маъқулгина Матмуса  
Ақли — шайин тарози.  
Дер: «Кўпчилик не деса  
Биз эмасмиз норози».

Ким билсин бу чархпалак  
Айланарди неча йил —  
Қишида — ёзлик бўз яхтак,  
Ёзда — қишлиқ шамойил.

Лекин Матмуса бир кун  
Ишни шартта қилди ҳал.  
Деди: тўрт фасл учун  
Қуринглар тўртта ҳайкал.

Халқ унга айтди олқиши,  
Тўртта ҳайкал қурамиз!  
Баҳору ёз, кузу қиши  
Алмаштириб турамиз!

Бу воқеа юз берган  
Жуда олис замонда.  
Энди эл ақли теран  
Донишқишлоқ томонда.

Суриштирса агарда  
Халқ юз фоиз саводлик.  
Олимлари шаҳарда  
Қилаётир устодлик.

Бориб кўрдим яқинда  
Матмуса соғ юрипти.  
Энди ёзу қиши унда  
Битта ҳайкал турипти.

Эслаб ўтган у ишни  
Ҳангомалар қилишар.  
Ҳайкал — тош,  
Ёзу қишини  
Фарқ қилмайди, билишар.

Лек эҳтиёт ҳар ҳолда  
Зарар қилмас ҳеч қачон.  
Қиши келганда ҳайкалга  
Ёпиб қўйишар чопон.

1991

## МАТМУСАНИНГ ЭШАК СОТГАНИ

Матмусанинг эшаги  
Айниб қолди дафъатан.  
Яқинлашиб бўлмайди  
На олддан, на орқадан.

Қўшқават арқонни ҳам  
Узар бўлди хароми.  
Ҳанграганда оламни  
Бузар бўлди хароми.

Миниб бўлмас устига,  
Копток қилиб отади.  
Бўлди энди, Матмуса  
Эшагини сотади.

Лекин қадимдан қолган  
Бозордаги қоида:  
Нима сотсанг, айбини  
Айтиш керак жойида.

Ҳеч кимса Матмусадек  
Қийин ҳолга қолмайди:  
Баччағарнинг айбини  
Айтсанг, бирор олмайди.

Айтмасанг — яна гуноҳ!  
Матмуса кўп ўйлади.  
Ўйлаб-ўйлаб бозорда  
Шундай дея сўйлади:

«Эшагим — арzon эшак,  
Келаберсин харидор.

Ўзи эшак бўлса ҳам  
Ўнта отнинг кучи бор.

Эшагим полвон эшак,  
Кўп хушинафас эшагим.  
Айби бўлса, биргина,  
Одам эмас эшагим».

Бозор аҳли кулади:  
Шунақа ҳам бўларми?  
Эшак ахир эшак-да,  
Эшак одам бўларми?

Бошқа айби бўлмаса,  
Бундай улов қайдга бор?  
Эшакни олиб кетди  
Арzonга бир харидор.

Қутулдим деб азобдан  
Шукур айтди Матмуса,  
Пулни ҳамёнга солиб,  
Уйга қайтди Матмуса.

Қайтди-ю қотди ҳайрон  
Ҳолат — худди кечаги.  
Оғилда боғлиқ турар  
Пишқирганча эшаги.

Афтодаҳол харидор  
Йиглаб турар қошида,  
Қўли, оёғи майиб,  
Тўртта ғурра бошида.

Матмусага дер: «Инсон!  
Имонингдан қайтдингми?

Эшак сотдинг, тепади,  
Тишлайди, деб айтдингми?

Эшак эмас, тўнғиз-ку,  
Бу махлуқинг мени ер.  
Сенда бошқа гапим йўқ,  
Эшакни ол, пулни бер».

Матмуса жавоб айтар:  
— Сенга эшак сотганман.  
Ҳушёр бўл, деб тайинлаб  
Одаммас, деб айтганман.

Энди қолма йўлингдан,  
Мен билан гап талашма.  
Арzon деб бир адашдинг,  
Бошқа сира адашма.

Дўстлар!  
Сиз ҳам Матмуса  
Ҳикматин унумтандилар.  
Эшаклардан ҳеч қачон  
Одамийлик кутмандилар.

1991

## ЮРАГИНГДА МАКОН ТУТГАН ҚУЛ

Билмам қандоқ, не сабаб, қачон  
Ҳаётингга ошно бўлган ул —  
Боши эгик, бесўз, беисён  
Юрагингда макон тутган қул.

Кимга даъво қилурсан, билмам,  
Қайси маслак, қай тузум масъул?  
Кетмас бўлиб жой олмиш маҳкам  
Юрагингда макон тутган қул.

Исканжадан етим зурриёд,  
Қатағондан бева қолган тул,  
Кўҳна замин қаъридан фарёд  
Юрагингда макон тутган қул.

Бургут әдинг, парвози баланд,  
Сенга ҳам ёр зулфиқор, дулдул.  
Нечук увол мусича монанд  
Юрагингда макон тутган қул?

Умр қошу киприк ораси,  
Гадоликдан адолик маъқул.  
Қуллар ичра энг бечораси  
Юрагингда макон тутган қул.

Кел, уйқулик кўзингни оч сен,  
Ўз ҳолингдан қаҳ-қаҳ уриб кул.  
Шундай кулки, ичингдан қочсин  
Юрагингда макон тутган қул.

1991

## ШУМ БОЛА

Шундоқ деди, қуллуқ қилиб,  
Гапни қўйиб жойига  
Янги замон Шум боласи  
Янги замон Бойига :

«Қошингизга яна келдим,  
Қулоқ солинг, Бой ота,  
Сидқи дилдан хизмат қилай,  
Ишга олинг, Бой ота.

Фазилатим кўпдир, яна  
Айбимни ҳам айтганман.  
Лекин энди янги замон  
Мен ёлғондан қайтганман.

Чунки энди ёлғонни ҳеч  
Айбина деб бўлмайди.  
Алдаганни бало урмас,  
Алданган ҳам ўлмайди.

Шарт эмас Шум бола бўлиш,  
Ёлғон букун осондир.  
Газет тўла, китоб тўла,  
Мажлис тўла ёлғондир.

Битта йиғин — Котибият,  
Битта йиғин — Раёсат.  
Ёлғон энди давлат иши,  
Ёлғон энди Сиёсат.

Иннайкейин демай туриング,  
Қулоқ солинг, Бой ота.  
Сидқи дилдан хизмат этай,  
Ишга олинг, Бой ота.

Ўн кишилик меҳнат қилиб,  
Парча нонга тўяман.  
Бир айбим бор, фақат баъзан...  
Рост гапириб қўяман».

Бой отанинг жаҳли чиқди,  
Деди, кўнглим зормиди?  
Ёлғонингга чираб эдим,  
Рост гапинг ҳам бормиди?

Йўқол, сени ишга олсан  
Хонавайрон бўламан.  
Ёлғонингдан омон қолдим,  
Рост гапингдан ўламан!

Ғазаб билан ҳассасини  
Қўлга олди Бой ота.  
Янги замон Шум боласин  
Қувиб солди Бой ота.

1991

## БИЗЛАР АРРА ТОРТМОҚДАМИЗ

Бизлар арра тортмоқдамиз,  
Арамизнинг тиши йўқ.  
Нега аранг тиши йўқ, деб  
Сўрайдиган киши йўқ.

Чунки бизлар анойимас,  
Пишиб кетган кўзимиз.  
Арра тушган ўша шохда  
Ўлтирибмиз ўзимиз.

1991

## ОҒРИҚЛИ САВОЛЛАР

Чойхонада ошхўрликни баҳт деб билган  
оғайни,  
Шу бир кунлик халоватни нақд деб билган  
оғайни,  
Қумурсқадек тирикликтан ўзга ғами  
бўлмаган,  
Дил олами, ишқ олами, рух олами  
бўлмаган,  
Имонни ҳам, виждонни ҳам қурбон қилган  
ҳалқум деб  
Сени хаёл қилдимми мен куйганимда  
халқим деб?

Эл мулкини бир чеккада тинч кемириб  
ётган зот,  
Беш тийинга қадрини ҳам, халқини ҳам  
сотган зот,  
Кўкрагида на ҳиммату на ғайратдан асар  
бор,  
Юрагида на орият, на шавқ бор, на кадар  
бор,  
Умрида ҳеч қилган эмас мулкдан ўзга бир  
ният,  
Сени дея тиладимми юракларга ҳуррият?  
Эй, кўнгилда можаролар орзу қилиб ётган  
жон,  
Тангриңг — амал, мартабадир,  
пайғамбаринг — шуҳрат, шон.  
Бу давлатга ўт қўясан, йўқотасан  
ҳилқатдан,  
Гар ҳокимлик тегар бўлса сенга янги  
давлатдан.  
Қуруқ гапдир сенга Ватан, халқу озод  
истиқбол,  
Сенинг учун истадимми юртимга мен  
истиқлол?  
Мудом кураш азобини фидойилар  
кўрганлар,  
Инқилоблар ҳосилини муттаҳамлар  
ўрганлар.  
Сиз ҳам бугун панадасиз, жангга бизни  
қайрайсиз,  
Биз бу жангда шахид бўлсак, аввало Сиз  
яйрайсиз.  
Ғофил халқим! Тингларманми сенинг  
наъра — унингни,  
Кўрарманми зулуклардан озод бўлган  
кунингни?

1991

## БУ ЗАМОН ҒАЗАЛИ

Тиллашибдир бўри бирла тозилар,  
Бирлашибдир ўғли бирла қозилар.

Не деб айтар ул баобрў анжуман?  
Қўл кўтарсин ушбу ҳолга розилар.

Зўр баҳодирмиз, жасорат биздадир,  
Пашша қонин тўккан эй мард ғозилар.

Биз чунон хизматга белни боғладик,  
Борми ҳиммат ўлчагиҷ торозилар?

Бизга нелар дер халойик бу замон?  
Нелар айтар келгуси ҳам мозилар?

Мен ғазал ёзмоқчи эрдим, не қилай?  
Бу замон тарихга шундоқ ёзилар.

1991

### ТУШ

Бир ой бўлди,  
Такрор такрор  
Мен бир хил туш кўраман,  
Тушларимда мудраб юрган  
Эл ичиди юраман.

Улар билан  
Мен ҳам мудраб  
Аста қадам судрайман.  
Бу — туш, дейман,  
Уйғон, дейман,  
Уйғонолмай мудрайман.

Ҳар тун шу ҳол,  
Фалак берган  
Бу не бало қийноқдир!  
Эй худойим,  
Эй худойим,  
Кечанг бунча узоқдир!

1991

## КЕЧИР, Ё РАБ!

Менга тош отди бир жоҳил,  
Кечир, ё раб, кечирдим мен,  
У кулдир, бандай ғофил,  
Кечир, ё раб, кечирдим мен.

Жаҳонда фитналар бордир,  
Адолат гоҳи nochордир,  
Адолат қил, ўзинг одил,  
Кечир, ё раб, кечирдим мен.

Ёмон бўлдим, ёмон бўлдим,  
Хато ўққа нишон бўлдим,  
Хато қилган эмас қотил,  
Кечир, ё раб, кечирдим мен.

Гуноҳидан ўт ул жоннинг,  
Сўзига кирди шайтоннинг,  
Кўнгил алданмоға мойил,  
Кечир, ё раб, кечирдим мен.

Тутарман ул синиқ одам,  
Синиқ имонига мотам,  
Дилига эътиқод жо қил,  
Кечир, ё раб, кечирдим мен.

У ҳам, мен ҳам қиёматда  
Туармиз лол хижолатда,  
Бўлиб даргоҳингга дохил,  
Кечир, ё раб, кечирдим мен.

Кечир, янгишмаган ким бор,  
Менинг ҳам кўп гуноҳим бор,  
Одамзод асли нокомил,  
Кечир, ё раб, кечир, ё раб!

1991

## КУРАШ ОИНИ

Гоҳ енгади,  
Тулки билан тулки курашгай.

Ҳар кимга кураш —  
Оини маъқулки, курашгай.

Куч шарти билан  
Шер ила шер жанг қиласар, аммо  
Ҳийла йўлида  
Тулки билан тулки курашгай.

Гоҳ ўртару гоҳ  
Ғарқ этадир сув била ўтдек,  
Жоним талашиб,  
Ақлу кўнгил мулки курашгай.

Ўз ҳолим учун  
Бир куламан, бир тўкаман ёш,  
Шоир дилида  
Нола била кулки курашгай.

Бас, Эрқин, хаёл,  
Қулни хаёл ўлдирад эрмиш,  
Ўлмаслик учун  
Ўй била бор қулки курашгай.

1991

# БОБИЛ МИНОРАСИ

Тушди Азозил измига  
Жонлар идораси,  
Бўлди хаёлда қурганим  
Бобил минораси.

Меҳр-оқибат йўқ эл аро,  
Ёнди нифоқ ўти,  
Бу ўт эмасму, ё қайюм,  
Дўзах шарораси?

Кўзимга чўккан дард-алам  
Бир кун адо бўлур,  
Кетсам юмуб кўз, умр ахир  
Қошу кўз ораси...

Кунлар ўтар, келар дедим  
Бир яхши кун, ва лек  
Ҳақ бўлди, кун кундин баттар:  
Элнинг ибораси.

Билмам қаролик бошима  
Қайдин, сабаб надир,  
Кўз қорасиму ё магар  
Манглайнинг қораси.

Эркин, не бўлсанг бўл, фақат  
Эзгу ниятда бўл,  
Кўрингай умринг уфқида  
Умид ситораси.

1991

## ДУСТГА ДЕГАНИМ

Инсон тилини

Тил билар инсон тушунибдир.

Дил дилни ва лек,

Ўйлама, осон тушунибдир.

Рост сўзни дедим:

Жонни қўйиб ўртага, аммо

Жондўст деганим

Вах, уни ёлғон тушунибдир.

Аччиқ эса ҳам

Чинни демак шарти садоқат,

Дўст англамаса,

Ёт буни қай он тушунибдир.

Мард мардни танир,

Дардни билар кўксига дард бор,

Жон садқасини

Жони фидо жон тушунибдир.

Исёнли дилим

Англамагай ғофил одамлар,

Кўнглимни фақат

Соҳиби исён тушунибдир.

Эркин, ғазалинг

Оқилу нодон уқиб олди,

Оқил ўзича,

Ўзгача нодон тушунибдир.

1991

## ҚИЛУРМАН ТАВБАЛАР

Қилурман тавбалар, гарчи  
Тазаррулик гуноҳим йўқ.  
Гуноҳим йўқлигига лек  
Нетай, исбот, гувоҳим йўқ.

Эшитмас эл фиғонимни,  
Келар олмоққа жонимни,  
Олурга лек ёнимни  
Менинг бир хайриҳоҳим йўқ.

На сўз дерман очиб оғиз,  
Забонсиз, қимсасиз, ёлғиз —  
Келиб чўқдим қошингда тиз  
Бўлак сендин паноҳим йўқ.

Ишончинг — менга ризқу рўз  
Забун ҳолимга солғин кўз.  
Тўкарга ёш, деярга сўз  
Ҳам оҳ тортарга оҳим йўқ.

Бу бандангда хатолик бор,  
Хатолик — жонфидолик бор,  
Шу боис кўп жудолик бор,  
Гадолик бору жоҳим йўқ.

Қаро қошингга бўлмай зор,  
Қорайгувчи не шомим бор?  
Юзинг ёд этмайин зинҳор  
Оқаргувчи сабоҳим йўқ.

Бу сарсон йўлда беҳамроҳ,  
Тополмам манзили дилҳоҳ,  
Муҳаббатдан бўлак, биллоҳ,  
Илоҳим, саждагоҳим йўқ.

Бу оламдан узиб кўнгил,  
Ёниб кетсам, вужудим кул,  
Унар ишқ боядида бир гул  
Бу кулдан, ишибоҳим йўқ.

1991

## КЕРАК БЎЛСА

Мен бор, сенга бир ҳақгўй —  
Девона керак бўлса,  
Йўқман, тили қанд нодўст  
Парвона керак бўлса.

Истарми сафо кўнглинг,  
Бор унда саройларга,  
Кел бунда, эсанг дардлик,  
Ғамхона керак бўлса.

Ҳамдам ўзим, эй ошно,  
Малҳам сўзим, эй ошно,  
Икки кўзим, эй ошно,  
Ҳайрона керак бўлса.

Бергум на керак сенга,  
Жон сенга, юрак сенга,  
Зардобга бўлиб кетган  
Паймона керак бўлса.

Богимни макон этган  
Эй сиз гала бойқушлар,  
Кўксимга қўнинг, Сизга  
Вайрона керак бўлса.

Вайрон чаманим водий,  
Кўксимда унинг доди,

Фарёдга қулоғинг оч,  
Фарғона керак бўлса.  
Найлай, бу оғир сўзлар,  
Қувманг мени, эй дўстлар,  
Оқиллар аро битта  
Девона керак бўлса.

1991

## ЙЎҚНИ ҚАНДОҚ БОР ЭТАЙ?

Бежанот кўнглимни қандоқ  
Сўз билан изҳор этай?  
Қай илож бирлан иложсиз  
Холатим ошкор этай?

Неча заҳматлар чекиб ҳам  
Топмагач ақлу ҳушим,  
Қилмангиз энди насиҳат,  
Йўқни қандоқ бор этай?

Ошинолар қочди мендан,  
Юз ўғирди ғофил эл,  
Не эди, айтинг, гуноҳим,  
Мен уни такрор этай.

Тўғри сўз түққанга ёқмас  
Ҳақ экан, э воҳ, нетай,  
Дўстни душман қилдим, энди  
Душманимни ёр этай.

Бул уқубат масканидан  
Бош олиб кетмоқ керак,  
Ўзни далли, бошпанамни  
Гумбази даввор этай.

1991

## ШЕТЬРИЯТ

Сен эй умрим наҳоридан  
Азизу ошино менга,  
Сахар Чўлпонидек жозиб  
Сочибдирсан зиё менга.

Ҳаёт ичра ҳаёт бўлдинг,  
Қанот бўлдинг, нажот бўлдинг,  
Кетурдинг ҳам сафо менга,  
Етурдинг ҳам жафо менга.

Сехрли май узатдинг сен,  
Дилим тинчин йўқотдинг сен,  
Мени ўтларга отдинг сен,  
Бу не ғайбдин жазо менга.

Ёниқ жоним аро жонлар,  
Қилур фарёду афғонлар,  
Мудом кўксимда исёнлар  
Бўлибдир юз бало менга.

Дилим чарчаб хатолардан,  
Эл ичра можаролардан,  
Қочар бўлсам низолардан  
Яна сен ошино менга.

Ҳимоятсиз замон ичра  
Халоскор бўл бу жон ичра,  
Вафо қилмас жаҳон ичра  
Ўзинг қилғил вафо менга.

Ўтар ғавғоли бу онлар,  
Келар осуда давронлар,  
Закий Эркин ғазалхонлар  
Берар бир кун баҳо менга.

1991

## ВАТАН УМИДИ

Агарчи исмим Эркин.

Эрки йўқ, банди кишан бўлдим,  
Кўзим боғлиқ, дилим доғлиқ.

Тилим йўқ, бесухан бўлдим.

Кўриб ҳайратга тушди

Бу жаҳон ҳоли паришоним,  
Бамисли анкабут сўрган —  
Чибин, пажмурда жан бўлдим.

Муаззам Сайхуну, Жайхун —

Лабида ташна лаб қолдим,  
Кийинтиридим жаҳонни  
Жисми урён, бекафан бўлдим.

Чекибдур Бобуру Фурқат

Ватан ҳажрида афғонлар,  
Мен эрсам, ваҳ, не ғурбатким,  
Ватанда беватан бўлдим.

Олисда, оҳ, диёrim, деб

Софинган, эй ватандошим,  
Дема сен ўзни бебаҳт,  
Бахти йўқ аслида ман бўлдим.

Шукурким, келди истиқлол,

Умидим рост қил Оллоҳим,  
Ки шояд бекафас булбул —  
Қаби соҳиб чаман бўлдим.

Ишончим бор, Ватан, бир кун

Келар чин нурли давронинг,  
Дегайман шунда чин Эркин,  
Чин инсон қайтадан бўлдим.

1991

*Адабий бадиий нашр*

*Эркин Воҳидов*

## **ЯХШИДИР АЧЧИҚ ҲАҚИҚАТ**

Техн. мухаррир *С. Собирова*  
Мусаҳҳилар *М. Назирова, Ш. Аминова*

ИБ № 39

Теришга берилди 23.03.92. Босишга рұхсат этилди 28.07.92.  
Формати  $70 \times 90^{1/32}$ . Школьная гарнитурада босилди. Шарт-  
ли б.т. 3,51. Нашр. л. 3,3. Адади 10000  
Буюртма 7169. Баҳоси келишилган нархда. 02.09.92.

«НУР» ИИЧБ, А. Қодирий номидаги халқ мероси  
нашриёти, Тошкент 700113, Қатортол күчаси, 60

Ўзбекистон Республика Матбуот давлат қўмитаси Тошкент  
матбаа комбинатининг ижарадаги корхонасида босилди.  
700129, Тошкент, Навоий кўчаси, 30.